

求恕齋
叢書

雪橋詩話餘集

七

I20
4



雪橋詩話餘集卷第七

遼陽楊鍾義撰

吳興劉承幹校

宣宗三十年中極鮮游幸 聖製龍泉峪建萬年吉地

詩有豈敢上沿諸制度或能後有一規模之句謝維藩
詩太監宰相呼弟兄索時憲書須新正宰相立聞 上
震怒予杖並命往監刑當時羣監股栗看此事到今傳
之驚嗚呼我朝家法監有明二百年無闕禍萌 成寧
盛德此百一宰相吾思富文誠

潘文恭思補齋詩祁文端陶鳧香序之穆耕珊相國澄

懷書屋詩朱文端序之而季仙九爲之跋或比之召康
衛武昌黎永叔或以爲顏謝之孤芳不爭房杜之取名
猶細表章燕許之宏裁獨闕韓歐之舊說連篇累幅未
能恰如其分際之所到二公詩皆所謂不暇唱渭城者
也穆相善草書以庚申通籍庚午典試浙江壬午典試
江南癸未壬辰乙未戊戌乙巳五典禮闈甲午典試順
天與文恭三典鄉會試三視學略同其輓曹儷笙相國
有云九原莫再憂天下竊爲明公任仔肩蓋傳其衣鉢
也秉政多年視曹滄之貴盛相等然羣從僅官曹司子
薩惠薩啟或宦陪京或奉 裕陵薩麟嗒徵薩善均以

州郡待次季子薩廉檢齋則通籍在身歿廿年之後當
日手握鈞軸未嘗使其子弟爲卿足見爾時 朝廷之
綱紀尙在也

顧仲歐萊崖詩鈔與石門施嵩禮登元和程世欽法杜
嘉興胡玉蘭枝王啟曾寶所合刻五家詩禮登謹厚樂
善兼精六法雜題畫冊云雲生山雨溼雲散溪流急雲
散復雲生山空人獨立寒鴉集空林暮煙起茆屋牛背
笛聲歸夕陽下山麓天高夜愈清木落秋初冷明月照
扁舟流光淡溪影暮雲生遠岫斜陽度飛鳥飛鳥去不
還斜陽在樹杪松雪天冠諸詩之意也

佟敬齋之夫人博爾濟吉特氏爲西齋洗馬女孫十歲
失怙隨母瓜爾佳氏讀一日輒數十行歸敬齋家貧甘
旨之奉皆出於十指間自課二子讀長引之水部熙恬
成進士次熙和亦以能文稱於時瓜爾佳玉山明府承
志工詩及楷法母東鄂太夫人爲治亭冢宰之妹知書
通曉大義熟朝章國故玉山少失怙太夫人課之成立
其配齊布楚特氏亦好爲小詩喜臨顏帖善大字麻姑
壇記道光壬辰令龍陽繪秋燈課授圖凡屋三楹竹几
油燈太夫人端坐授經玉山侍立聽受別一楹其配據
几臨池作停筆望牕外月色狀鄧湘皋有詩賦其事

嚴厚民明經純篤好學爲詒經精舍翹材生道光元年
重刻其七世祖忍公與兄調御弟無敕作朋集三卷爲
忍公昆弟自相酬和之作崇禎庚辰六十生辰同社鐫
以爲壽者也忍公子顯亭司農計偕北上忍公屬謝文
侯繪小像付以隨行勛以立身行己以縱浪狹邪爲戒
其論盟社有云今有僞朋而無眞朋須於朋友一倫忍
情刪正始得爲忠臣孝子孫頤谷謂切中當日門戶之
病司農順治乙未通籍雋齋少司馬曾築繼之皆能以
廉謹自厲信清芬之有自也

石門吳文照髮堂以舉人官於粵引疾歸移居禾城道

光丁亥年七十距乾隆戊申四十載與唐蔗圃陸硯齋
陳江樹諸同年作榜壽讌有詩云一冊登科記尙存事
如春夢去無痕卅年虎榜聯名早四老龍鍾入社尊柳
岸泥融巢客燕梅欄風暖鬥清樽同袍零落無多在幾
輩傳經到子孫

濟南王培荀雪嶠辛巳舉人官榮縣知縣仿錦里耆舊
傳爲聽雨樓隨筆八卷凡蜀人士及游宦於蜀者佳章
軼事摭拾存之異物殊俗可資談助者尤多復輯鄉垣
憶舊錄則齊魯間舊聞也間作韻語以紀風土道光癸
卯蔡麟洲侍御振武按試嘉定見所作嘉州竹枝詞十

二章以爲山川能說其記武弁馬右文與豐公紳博戲
相爭及豐官四川提督馬隸麾下懼獲戾謂人曰吾二
人不相能欲告退其人止之曰豐公有識能用人君與
彼私嫌耳以君才必不相棄吾試探之一日邀豐飲酒
酌微及其事豐沈思曰可召之來馬至伏地謝豐扶起
大笑曰彼時吾輩徵逐事何謝爲速坐飲酒卽命入提
署辦事豐旋授成都將軍卒薦馬擢顯職如豐公者豈
不廓然大丈夫哉按豐公字瑞庵佟佳氏隨征湖南逆
苗有功往湖北剿白蓮教累獲賊酋覃加盛覃加耀張
正潮追賊入川嘉慶六年賞勇號擢提督定雷波猓夷

禽羅思蘭殲苟文潤偕方有堂破十二地嶺夷及曲曲
烏生番官蜀十有二年爲羌蠻所憚曾以將軍署川督
十八年丁父憂扶柩歸以哀毀卒於忠州舟次謚襄勤
樸庵督部恩特亨額質厚開爽有聽斷之才由秋曹出
牧和州厯官山東道府入爲少司寇尋督漕運總制關
隴卒於位其題畫雪竹云呵筆寫琅玕開窗雪未殘此
君原有節相對不知寒亦特工小詩也什勒氏子春熙
春輅均官翰林
潘少白詩閒淡超曠性好游足跡踰數萬里在蜀居青
城大西山西居藐姑射江介居龍眠九華游京師居西
山善姚鏡塘程春海姚伯昂嘗言聲聞過煇赫便須急

自揆檢一友扶母喪過江南一路護送之盛無比固其
孝思動人但一舟寂然而過安得如此吾當日在山右
實中無所得徒喜爲驚人之舉致使人載金隨後冀我
偶用以誇同輩今所見略近人而用心略平實人亦漸
靜此等處最易自驗卽致書此友勸其進善書至而此
友已歿矣案林阜閒集與蓉臺洗馬云素履就道後於
午橋處得一路音耗水陸迎護數千里觀歎之盛知太
夫人閭德與足下孝思感物之遠竊幸人心好善實實
可驗然諮尙有惕者喪親有聞必非足下所樂受而聲
聞震於遐邇君子處之必有畏心人生慘遇大變如時

當冰雪斷無春陽驟舒之氣以化機消息度之恐非幽
憂中之福其戚洗馬傳謂荅臺廉毅不苟爲居已正接
物厚應事才未見其止而以未終喪爲惜伯昂謂少白
自山西歸弟子致贖皆不納有數人潛與偕行贖金爲
太夫人壽抵越而後發不可返乃各取少許同至家太
夫人怒曰汝見僧以如來像丐市者乎吾固像也乃謝
而盡散之自是遇取予益兢兢知其自督與責善皆不
苟也

沈文起寄董上舍士錫云經旬襤被共霜寒玉骨金心
向洒闌科第於今風漢少江湖有此俊人難不愁妻子

眠龍具聊壯書生跨馬鞍強欲悲歌誰屬和南山木石
自同壇晉卿客游爲養黎襄勤嘗聘修續行水金鑑行
水金鑑作於雍正間傅育庵於黃淮運三河爲備君以
爲前作詳於考古續之者宜詳於徵今如永定河工程
今增於古幾十倍而前書未詳尤宜備載襄勤卒其後
河督張芥航副河督潘芸閣仍延君纂修而卒成之李
申耆嘗言同時有三畏友謂晉卿與方彥聞及海甯蔡
逸逸友逸友挽晉卿詩虛名謬忝誇三友勝侶差忻聚
九原謂彥聞時亦告逝也

吳中問梅詩社創始於黃蕘圃石琢堂韞玉彭葦間希

鄭尤春樊興詩張時塘吉安預焉韓桂舫吳棣華董琴
涵歸里涇縣朱蘭坡主講正誼書院先後入社潘理齋
亦時一至每歲東坡生日賦詩獻壽黃文節生慶厯乙
酉道光乙酉十三甲子六月十二日同社集百宋廬爲
文節作生日案陳宋槧黃集次年堯圃卒他若正月二
十日白文公生日二月二十日蘇文定生日五月五日
周元公生日五月十一日文信國生日五月二十八日
顧亭林生日六月二十一日歐陽文忠生日七月初五
日鄭康成生日七月二十九日王伯厚生日八月二十
日朱竹垞生日八月二十八日王漁洋生日九月十五

日朱子生日九月三十日王文成生日十月十七日陸放翁生日十一月十一日司馬溫公生日士大夫多有設祀飲福者亦承平之韻事也

七月二十八日為東坡忌日徐學人嘗集同學

諸子肇記賦詩成卷

道光初先叔曾祖信庵先生諱恆筦權淮關與張芥航

河帥相得甚歡宣房之暇詩酒譚宴還京之日河帥有

送行二律云旅雁方南去鳴騶正北征三秋成小別一

載見真情萱砌春常駐荆枝老更榮欽君敦孝友愁絕

對離觥稅外方圓急錢流地上難各關稅以盈餘作為正額故及額者少

歸裝輕更好落木氣初寒繞策臨歧贈潘輿載道安歸

朝宏遠略九萬看鵬搏

馮柳東居秀州之梅會里有竹垞鄉親小印阮文達重建曝書亭後三十年垣牆傾圯柳東謀于邑宰創捐重葺焉卜築勺圍爲顧咸三文學扶青閣故居嘗與金香谷菴清芬祠於梅溪禪院祀里中詩人無後者復菴葦其詩附以小傳得八卷曰清芬集凡六十餘家香谷名菴字蘭友柳東舉其斷句如樹合連村暗山遙一髮青藉草聊爲圃留雲借作山檐牙遠帶星三點屋角斜懸月一鉤花開先問近圍樹月落不知何處船凝雲不厭屋低去好月忽貪窗破來樹裏斜陽鴉背去雲邊秋色

雁捲來其月鏗年鍊以吟詠自娛亦自可傳香谷旣卒
里人送其木主耐清芬祠有詩紀事

錢南園通政三子長嘉榴早歲就親杭州夫婦俱歿葬
吳門西山之麓次嘉棠字召亭癸酉選貢官廣文亦先
逝季嘉棗字仙巖道光紀元舉孝廉方正客死江南俱
無後保山范廉泉刺史仕義時宰如皋爲卜葬於邗江
鈔關門外有詩紀之廉泉出顧南雅門下南雅歿捐俸
刻其遺集又刻南園文集以傳亦篤於風義者也

馬伯泉觀察洵先世海昌移家梅會與郭頻伽吳榕園
馮柳東黃霽青殷勤宴喜流連詞賦子翰亭兄弟刻其

五千卷室詩附餅隱詞一卷柳東購得朱竹翁分書綺
羅香竝頭蓮花詞箋乃第二闕也與集刻略異當是初
稿乃裝池成冊依韻賦此闕云鷗國新秋漁蓑舊夢水
調翻成宮體小築溪亭卻對六峰螺髻掀翠蓋蓮座雙
擎划畫舸蘭橈齊理想嫣然一鏡明妝舉芳人在綠雲
裏輸他池上鴛侶曾見紅衣白髮詞場游戲此日重尋
賸有露痕如洗銷不盡老柳煙凝吹欲斷白蘋風起賸
涼階葉葉梧桐滴殘疏雨幾

連平顏氏三世開府皆嘗巡撫雲南尤爲盛事張培仁
顏魯輿制軍挽詩所謂三持玉節衍雲祚商代伊巫慶

共升是已魯輿之祖若愚知泰安時東巡召對 高宗
有顏希深他時可大用之褒尊人惺甫官禮部時以木
蘭校射四矢皆中賜花翎督直隸時有以直隸差務殷
繁請於地畝攤徵以均徭役者奏言立政貴持大體無
事紛更 仁宗褒荅焉

書碩農以壬午進士出宰冕甯歷西昌三臺蒼溪巴州
簡州越嶲廳以廉能稱長於詩文著有建南風俗略及
有益山房集送客云蕭疏風雨外落葉送行舟故國湘
南水離情冀北秋帆隨歸雁遠目斷野雲浮已近黃花
節相思一倚樓在蜀與香山何日愈濟南王培荀郵遞

唱酬詠秋蟲句云依人如有訴吐恨不成聲同人爲之
閣筆其西昌雜詩云邛海非江水絕底暗通潮天影落
虛靜山川隨動搖如何挾夏雨遽乃浸秋苗不道長河
廣波瀾漸漸消未遂游山興城樓共客臨風煙開沓嶂
水石澹重林日與西陲遠秋應北望深躊躇懷古意縱
筆漫長吟石洞流仙跡雲峰出玉泉仙人騎鶴去玉體
尙冷然我愛升庵筆來尋古洞天題詩人不見流水自
年年控險資雄鎮連環十二營麾旗夷瘴散試馬野花
明春暖烏蒙國霜寒孟獲城鄉民傳令節猶爲武侯迎
漢代征西竦窮荒烏道開至今諸父老猶自待招徠板

屋星居錯禾田火種纔近來人廣聚夷漢雜巖隈地接
滇池近天過相嶺低隔山分冷暖流水任東西鑪火干
僮鑄蟲園萬戶齊邊方多樂歲無事餉炊藜繞屋園蔬
密隨田堰水通牆承仙掌露逕颺稻花風小市新添織
荒庵徧訓蒙安居同上國何更賦哀鴻椎髻披羶毳榛
榛自在游鍋裝連袂舞酒債計田酬混沌若無鑿遐荒
安有憂忘機對鷗鳥親近可同舟面面設重關邛城逼
猓蠻雷喧懷遠水雪隱小涼山戍鼓今無警荒田半就
刪閭閻安作息自覺訟庭閒一樹寒梅發無人亦自香
詠花誰見賞攜酒客同狂紅杏先爭候黃華並耐霜南

天風信異滿目得春光可以見甯遠風土三臺北郭有
琴泉寺碩農詩會得宮商趣琴泉韻最工何人志流水
此際送飛鴻古洞虛延月長松迴帶風塵襟一以潔不
用更揮桐攝篆蒼溪僻邑也明沈國建坊題曰川北涪
邑碩農有詩十首皆以涪矣蒼溪縣爲起句如涪矣蒼
溪縣離堆映錦屏晨星魯國字江雨少陵亭勝蹟留音
輩斯人緬典型摩崖碑孰續斑駁薜蘿青涪矣蒼溪縣
偏隅別見春山高無曠土洞古有居民龍山古洞有戢
姓世居其中
叱犢青天外歸樵紫水濱紫溪水名邇來三十載里黨久和
親涪矣蒼溪縣人多數代耕蜀自獻賊之後民多係遷
來而蒼溪有自元明迄今

土著揮鉏忙健婦賽社潔雞牲老未識官府居常遠市城

青林紅葉裏草屋半巖橫湍矣蒼溪縣陰晴異冷暄母

風吹壑轉地有公風母風母風每起轉數日顛雨涌溝翻水蓄冬田足

蠶收夏日溫叟童忘甲子卽此是桃源思閒語雋亦姚

合武功三十首之類也

定王載銓未襲爵時爲工部堂上官叱辱滿司官出俚

語僞詈其人訐之 宣宗置尙書吏議湯海秋入臺不

兩月以爲司官朝吏過失當付有司不可奴隸辱之此

臣作威福之漸也吏議不足以儆援嘉慶中故事上章

論之言過當且在已奉旨後坐是斥還部以甲辰七月

九日卒程伯專挽詩云天上昨宵聞奏樂人間從此息
彎弓姚石甫言道光初余至京師交魏默深張亨甫龔
定庵及君定庵言多奇僻世頗訾之亨甫詩歌幾追作
者默深始治經已更悉心時務其所論著史才也君乃
自成一子是四人者皆慷慨激厲其志業才氣欲凌轢
一時以宗室尙書之親貴舉朝所屏息者而君昌言彈
之亦見骨鯁之風矣

齋宿聯吟草一卷道光初詹事府署每遇致齋同人拈

題門韻所存之作也其冷布聯句云脫絮披輕袷

李芝齡宗

防裁羅換薄幃窗遮朱鳥暗

福申禹門

隙過白駒微肯使晶

簾護彭邦疇何勞畫障圍雕櫺除故紙隆文疏布簇新

機芒費連番績鍾昌籃曾幾日晞玲瓏穿穴巧穆馨阿

經緯列紋稀畫裏棋枰認芝齡行間綫縷依孔方分界

限禹門洞達辨幾希聯絡千絲網春農縱橫百衲衣經

心防熱惱雲章著眼散炎威坐豈煩屏隔仰山人應忘

汗揮采恩連影漏吟濤冪慙少塵飛偶見檐蟲罍芝齡

遙窺野馬駭癡蠅鑽或誤禹門乳燕睇偏違庭樹扶疏

映春農軒風淡蕩歸月痕飾鎖碎雲章花氣透芳菲爽

漸生松榻仰山虛同啟竹扉被池寒浸夜吟濤屋角晚

流暉卻暑停紈扇芝齡延薰拂玉徽奇休誇火浣禹門

空不礙煙霏老去看紅瘦春農閒來悟綠肥冰綃應比

似雲章霧縠尙疑非澄水何須帛仰山招涼漫用璣筒

中黃潤貴吟濤好並貢京畿芝齡諸人而外尙有奎照

玉庭白鎔小山龔守正季思邱煌芙山都十人其摺疊

扇作云展處觚三角張餘玉一隈卷心蕉葉斂揮手箸

帆迴均極組織之巧想見宮僚雅集美具難并

梁溪楊靜貞女史蘊輝爲蘿裳女孫歸于董善畫工諸

體詩詠落葉云墮地便成無用物因風時作不平鳴竹

簾云明眼中分疏密意虛心早具卷舒才落花云身前

慧業驚心夢悟後繁華過眼塵絲芊溫麗詠物中時見

寄託

崇川王菽原方伯性豪邁能決事嘗以禮部參預樞廷
由楚藩乞養里居十年年逾耳順太夫人九十有一辛
亥生日作云林景晨披愛日暉循陔已計十年歸卻看
碧沼新荷長正盼雕梁乳燕飛傳坐醉傾元亮酒杖鄉
稱著老萊衣客來莫道無殺菽櫻筍堆盤豆莢肥與陳
碩甫交四十年刻恩暉堂集碩甫爲之序其癸巳春闈
分校薦俞理初及徐菊牖卷徐雋而俞報罷蓋爲曹文
正細東置高閣而阮文達初竟未之見也菽原卽事賦
詩云東風消息判春城華國文章自有聲卽是我聞眞

識面最難人說舊知名夜光豈合山輝闕丹液終期鼎
轉成得失楚弓何可料筵尊心苦說分明五色漏瀾到
手披珠光恐或海中遺雌黃過後翻成誤皁白從頭轉
自疑真氣自窺河嶽秘寸心上訴鬼神知低徊十二年
前事慙說朱衣暗點時頰上纖豪掌上紋丹青倏忽化
煙雲有時豕亥刊成謬容易魚珠混不分奪命偏爭填
海石登壇始識背鬼軍輸他藜閣星光炯翥鳳翔鸞已
出羣鼓應桐魚石引鉞眾材森立尙如林明珠一掬鮫
人淚流水三彈海上音眼底新陰栽欲徧簾前落葉掃
何深冥鴻已分翔寥廓暮雨瀟瀟識此心理初癸巳類

稿菽原爲釀金刻於京師其存稿刻入楊氏叢書

許珊林年文明律學精六書壬辰文文端管理成均編輯太學金石志薦充纂修官書成甄敘擢牧平度黃海華官助教時亦最爲文端所知賞自言生平師友問恩遇最厚文端詩不多見重直樞垣有句云地密心知垂戒切材庸身懼受恩多

朱述之以壬午舉人久官浙江丙午收復舟山檄辦善後事宜有昌國典詠十卷於山川洋壘之險墩臺關隘之設興廢戰守之迹忠臣義士之祠墓名賢學士之第宅詳始末決異同辨俗語之訛謬糾古志之疏略使荒

僻之地文獻足徵江甯臧書燬于賊復在浙傳鈔多見
汪振綺吳拜經諸家藏書又與錢警石蔣生沐勞季言
諸人交時有采獲張嘯山感逝詩所謂藏書遭賊焚三
篋還自寫者也輯金陵詩徵每假同邑甘氏津逮樓書
其開有益齋讀書記極精核

內閣票擬向沿前明舊制雍正四年命設軍機房凡臣
工奏摺由軍機擬諭旨頒發惟題本仍送內閣由大學
士閱看票籤後進呈既得旨內閣學士以硃筆批發六
科道光初年曹文正任軍機大臣英煦齋直南書房孫
寄圃總督兩江長懋亭總督雲貴蔣礪堂總督直隸皆

不能赴閣惟託文定閱本乙酉文定復兼刑部尙書亦
不能每日赴閣乃於召見時陳奏及之 宣宗命閣學
五人閱本朱虹舫預焉其恭紀詩云出納絲綸地望崇
前朝稟議弊尤叢 憲皇特創樞庭制宰輔彌彰秉筆
公利害總關天下計變調還藉省中功小臣珥管慙無
補對命時思勵此衷閣學掌朱筆稟本有兼直南書房
者閣臣令中書代稟送堂餐以酬其勞張商言舍人詩
所謂趨陪青瑣奉宸章隅坐偏升政事堂者也商言嘗
奉派爲烏魯木齊諸城 賜名書額亦可入中書燕故
王句生吳舅氏云十載吳鴻吳斷音埃塵終古若爲心

苦遭薄俗黃金散忍繫微官白髮尋夢裏鄉園空夙願
山中旅櫬歷春陰當時飯舍何人視恨到羊曇馬策深
迴憶牽衣省鹿城杖藜扶送淚雙盈明知短燭非生別
可奈空船促夜行盤肴吟殘莊舄病懷瑰悲結渭陽情
從今如母終無見夢繞婁江水瑟清謂劉古愚廣文也
廣文名人直乾隆癸卯鄉薦計偕入都館慶文恪邸第
十餘年以鑲藍旗教習報滿選婺源教諭後任崑山教
諭道光癸未邑水災承辦賑務晝夜躬親力杜假冒舟
次積礮有鄉者餽水鬼一雙曰聞公損膳累月願一佐
箸固辭不得遽命烹之比進則與從事者曰爾等辛苦

藉以相勞余豈食此每深夜不能寐則爲詩以紀事放
賑歸值歲暮城中頗有流亡復捐廉設粥廠於學舍內
外大哺餓者存活無算與人言輒曰此分所當盡故不
肯營優敘之典焉亦校官之卓卓者也

高要彭春洲泰來年十五初應童子試蘭圃太守恩保
取冠邑士且語諸教官今年試十三縣止得彭某一人
嘉慶甲子蘭圃罷官居郡中試院春洲往謁曰他時至
京可相訪也是冬卒後十年春洲來京訪其家不得有
詩云學飛雛燕附冥鴻回首髫年短夢中兩字早慙誇
白傳五經誰料許黃童夜堂官燭論詞賦丹旄寒江湖

雪風今日萬人如海裏賈生何處哭吳公感知之意甚
深春洲先德東郊著詩義堂集春洲詩以後集名大抵
多憂患之言種竹云萬物誰無私汎愛非自得後大水
云有生趣既盡百禍理亦同辛丑感事云何人是臣子
合手障皇天道中感春云地入他鄉無遠近天當春月
易陰晴到眼儘看佳士滿上心終覺古人多秋圃和韻
云牆頭薄日幽花斂夢裏青春老樹知春感云生縱不
辰非汝獨古如無死任歡遲羅伯麟刻其詩跋云情不
汨性感不留物其存詩始丁卯迄丁巳止於梧州行一
篇亦可以論其世矣

陳在謙有高要二何傳彬字公度元字叔度從馮伯子
游初高要莫元伯善齋德慶溫承恭莊亭新興陳熾雲
巖陽春譚敬昭康侯與二君同儕輩其後出者彭春洲
及在謙公度多往來西園主春洲叔度自訂其詩疾篤
以集序屬春洲公度詩無全稿從子榮祖授春洲商訂
在謙爲序長洲梁維斗刻而傳之春洲曰公度有隱孝
嘗割臂療其父非獨詩人也

溫明叔侍郎及惜抱之門深於厯算之學與梅伯言甲
乙科皆同榜自謂實師事之謂伯言論詩以眞爲貴試
觀子卿經萬里赴沙漠六語與攜手河梁數章其眞僞

爲不誣矣不必原書所稱擬蘇李者之爲擬作也又言
詩說亦同昌黎文說氣盛則短長高下皆宜太白天上
白玉京與杜老北征同善其聲清蒼大舶雙艣中流作
鵝鸛鳴必以身處之知其語氣與事稱矣小詩如崔顥
七夕胡武平茶煙漁火輩清致翩翩亦輕盈可掬伯言
有品彙自點本屬覓樂府廣序同肄之皆謹識不忘云
云足見其服義虛受也高棟爲閩十子之一選別唐詩
終明之世館閣咸宗之虞山新城秀水攻品彙一編不
遺餘力伯言平點本末之見大抵詩文各有入手處正
不必故爲高論耳

仁和沈聽篁給諫鑠早歲侍其尊人眉峰守臺灣臺中
物候較早有七月梅花圖除夕庭下十三種花同時盛
開聽篁賦臺花吟一篇並屬江石如介圖之自注謂三
貂社距淡水城四百餘里荒山中有硃砂牡丹一株林
逆之變徐太守夢麟剿賊至其地親見之胡書農詩有
云先時而開看更好寫入圖期花不老就中獨少洛陽
枝怕與龍團催貢早方今 聖人卹遠民荔支貢不勞
紅塵金莖鐵樹海外種德澤所被長陽春圖花何如圖
百穀穀能養人花悅目吾聞臺陽歲三熟好譜嘉禾輝
史牘道光乙酉東軒社集作也後來閩撫王文勤有臺

灣雜詠聞人馬清樞山陰何竟山均有紀事詩皆足備
參攷

徐松龕久官閩粵諳悉夷情 宣宗詢以各國風土形
勢奏對甚悉爰命采輯爲書書成曰瀛寰志略未及進
呈而 宣宗升遐由閩撫內召壬子以僕少典試四川
旋以事免歸家居彭詠莪相國懷松龕五臺云秉鑑峨
嶂歸閉門婆娑榆社古風敦嗜奇曾覽吾妻鏡博物還
求子父尊汾水清時無客釣太行險處有軍屯風塵已
遠春光轉可得攜筇花柳村同治乙丑詔入譯署補同
卿居三年以老疾致仕癸酉重赴鹿鳴卒年七十九咸

豐初所上三漸宜防疏一曰土木二曰宴安三曰墜蔽

文宗爲褒答焉

陳烈婦名鳳姓陸氏諸暨陸家灘人年十六適縣卒陳
維章甫三月而難作胡書農仿新樂府作鵲鴿化鴟行
孫兩人作灘水清且寒行錢蕙窗作高寒月落行莊芝
階作嗟哉兩賢婦行孫作敘事尤得昌黎嗟哉董生行
之意錄之陸家灘灘水清且寒陸家有淑女命名以鳳
資姓端鳳兮鳳兮所值之境何艱難一解閨中婉孌含貞
心幼歲留字方曰琴曰琴有兄人而禽造譎語謀殊陰
二解心本貪貌美而偏曰貌惡夫也不良反信兄言爲不

錯擇配於李情則薄阿兄之計一何虐三解父既告其族

人又復白諸邑宰族若弗聞兮宰竟受給吁嗟乎斯時

勿改圖而又何待四解夫義既斷絕父命宜遵循遣嫁陳

郎非私奔事王姑勛夫子盡禮盡孝傳里鄰五解女本弟

婦男則兄冒稱匹偶乃輒欲其相從故婚未三月而訟

已興於以龍六解民之父母真可恥不辨是非竟如此數

十百人環而視何有零丁一女子不能死輿中不能死

河水并州快翦亦難使一言報郎惟有死七解誰為守護

者賢哉有李氏遇人不淑其心大愧恥與其生貽羞轉

若死順理一條繩兩命繫相約雉經而已矣八解李氏方

以龍弟婦與陸同雉經者也張淵甫曰烈婦一縣卒妻
耳事祖姑婉婉盡孝鄉里稱善婦不意其臨大節乃勇
決如此李氏非有逼迫於後甘心并命其事甚奇要其
志慮深矣或曰以瓏怒李比於烈婦穢言詬之遂憤激
捐生有司據以入奏劾令而置以瓏於法予烈婦旌李
與焉

高郵夏氏代有聞人王寬甫序夏瘦生詩謂其氣清韻
遠如幽谷蘭秋疏林磬曉落花云一聲嗁鴉怨花叢吹
散瑤階萬點紅尙有清陰供結子未妨飄泊付東風三
生流水豈凡材回首春風費翦裁借帚掃愁囊貯恨于

金收骨上燕臺雨窗過話云薄酒深談不厭真晚風作
冷夏猶春伶仃珍重斜陽影白首鷗心賸幾人十日五
日互相見一月一花休浪過隔世冷緣虛結約何如歡
意眼前多

時帆通副多歡伊爾根覺羅氏別號海槎道光間在蜀
與張曉瞻日昃蘇鼇石廷玉李西澗惺多所倡和戊戌
人日游昭覺寺云知交三五來蘭若偷暇尋春飲最宜
滿座泉香人送酒繞闌花影客催詩共操舟楫逢多士
暫假吟哦記盛時如此勝游須盡醉明年相聚恐相思
立春日少陵草堂云選勝出城闌松篁映水濱詩尋工

部宅香碎錦江春草色濃于酒梅花瘦似人西園佳話
在休笑迹陳陳未了前番興重將韻事申丹青添畫本
風日健吟身對我皆仙侶論交亦夙因盛筵誰再續橋
畔柳全新草堂雖非浣花舊址而竹木極幽勝昭覺寺
則宣華舊苑也

阮芸臺秦小峴選刻江浙詩存盱眙王子和蔭槐王子
臣效成與焉李申耆敘兩家詩亦有二王之目又與柳
村徵君稱三王子和通地理學於顧宛溪胡朏明齊次
風洪稚存諸家所著書原委絡脈異同沿革口講手畫
儼若身歷癸酉鄉舉丙戌挑二等授貴池訓導以目眇

不之官傅楮生稱其厚黨勤類學者以爲宗子錫元蘭
生亦知名

瑞安項霽叔明爲有用之學與端木鶴田及泰順董旂
霞樵永嘉項維仁果園游郡中旁郡山水無不到台雁
雜詩錦溪云如織亂流明行吟溪路靜鬱碣翔鷺鷥無
人長照影時看金磔沈倒瀉秋光冷天聰洞云古洞竅
渾洞面勢幽田寬木葉蕭蕭下誰言石室寒斜光射題
壁重剔苔蘚看老僧巖云飛錫來陽阿法雲此常住巖
巖千尺身奚用七竇布津梁殊未疲山立君亦悟梯雲
谷云架石疑人工穿洞藉筇杖潺湲繞磴流回首慊幽

賞雲深不見人忽聽樵歌響仙橋云華林夜色澱山白
玉光曙何人駕彩紅同詣鈞天處雲中八景輿爭看度
橋去石梁洞云洞天生白雲誰號茅龍起垂頭一石梁
宛與牖中似風來鱗甲飛葉落暮山紫安禪谷云中瓶
寄春浮不厭厓厂小繩坐注楞伽幽栖何渺渺夜禪留
一燈明滅空林杪小龍湫云懸瀑出林梢淙射互昏曉
千尺青崖間游龍何天矯長如白練飛吾欲齊大小靈
異亭云諸峰龍鸞姿他山莫能致鑿翠築一亭角列復
環侍狎視英雄人冠劔了無異翠微嶂云高厓張畫屏
蘿薛紛未翦况值山氣佳玲瓏玩迴轉煙霞明夕霏嵐

翠條深淺牛脊岡云岡陵縱有棱屐折足欲裹攀龍誰
敢登騎虎勢難下逡巡牛脊行莫厭五步坐碧霄峰云
杖策傍靈溪危岑拔仙掌亭亭飛鳥邊直軼青霞上迴
顧峰頭雲種桃結遐想叔明博覽古籍不能有合於時
其弟几山序其詩而悲其徒以詩見也

番禺陳棠谿客曹其錕精鑒古阮文達進呈王象之輿
地紀勝其景宋鈔本在其家詩多詠古感事之作兼工
填詞自序謂萬紅友言止一途仄兼上去入不宜遇仄
以三聲概填必審音下字斟酌盡善然後抑揚抗墜得
之微吟婉諷間昔寄閒老人每製一詞必使歌者按拍

稍有不協修改再三其瑞鶴仙一闕云粉蝶兒撲定花
心不去閒了尋香兩翅通體皆協惟撲字稍戾改守字
始協又惜花春起早云噴窗深深字不協改幽字又不
協改明字此三字皆平而五音有唇齒喉舌鼻之分輕
重清濁犁然各判則信乎協音之難也鄧嶰筠謂其水
龍吟之搵銅仙淚銅仙二字相連臺城路之隔紅塵正
遠斷腸人易老末二字並用去上皆恪守家法不肯徇
錯蓋於格律節簇剌度毫釐者久矣

嘉魚涂平甫方伯文鈞幼隨父開元至京師從鮑覺生
讀書遂以宛平籍成進士官御史彈劾穆鶴舫者介春

兩相國著直聲出守甘涼多善政洵至江甯藩司殉癸
丑之難詩有送丁紫琳歸泰州云大江之外天東垂海
水冥茫山陸離中有異人丁令威騎驢款款來京畿九
門潭潭薦書稀貿然披褐懷其璣今將去我相拒違執
子祛袂申言詞屬者天兵西討夷至今寇盜猶猖披子
不爲虎爲熊羆拂衣而去行安歸況乃河決東南疲天
子殷憂民咨痍盍爲舟楫往濟之執樞機者今其誰肯
以吾言叩天扉吾力不能空爾爲風格頗近昌黎紫琳
名楚玉丙申館選官雲南知縣

沈湯王慈雨考功詩爲張亨甫魯通甫所稱春晚出城

南看花云城南池館淨莓苔春盡閒曹冒雨來煙水有
懷聊縱縱園林無主自銜杯冷香入酒客微醉薄霧壓
籬花半開爲愛晚晴緩歸去夕陽紅上好樓臺意態極
與放翁爲近

姚石甫武陵謁趙文恪墓有作云海內紛持節傾心獨
武陵一誠終結主大德不矜能蠻徼遺祠廟朝廷失股
肱豐碑明詔在衡岳共峻嶒嶺表棲遲日諮詢早夜周
每聞天下計獨抱盛時憂弟子言容薏羣公忌未休遺
編終不朽腸斷海東遊文恪服官每舉陳文恭公以自
律在粵重刻從政訓俗二種遺規 宣宗召對有誠實

不欺及公正忠誠之褒漳浦黃忠端從祀東廡公所奏
請也石甫稱其平生大節凜然朝望比之壁立千仞觀
察惠潮時蓋嘗在其幕中

掖縣翟文泉助教云升壬午進士爲桂未谷弟子著有
隸篇十五卷續十五卷再續十五卷校覈精詳深資小
學陳梁叔戊戌客萊州嘗贈以詩云除官不赴家有政
萬事田園老增勝教督非無馬援書拜迎嬾挂陶潛印
廓然堂宇向日開牆竹參差池水鏡青燈有味照白髮
猶似兒時快歌詠無心纍見桃李實有道能安魚鳥性
山村花落天氣佳往往出遨發幽興觀時忽喜羣物茂

扶老何須一枝勁肆勤昔慕東岡周清志今爲弋陽鄭
吾聞先達在鄉里貴以醕風俾激振柰何末俗矜勢位
梁肉保尊空自聖先生乃是義皇人直化元不知競
世間烜赫笑奚事門內慈祥眞可慶屢聆老語感周諒
如入春和樂靡竟眼輕萬族久蒙謗書展他年猶動敬
時以所作
隸書見贈丈間亟拜公勿辭征鞍欲跨吾難更

賓州女史陸小姑適覃氏以不諳農事見放依母家十
二年幽怨卒汪孟棠云任守思恩哀其遇爲搜遺詩刻
之王子和爲賦紫蝴蝶花歌云宛宛蝴蝶花託根橫江
側蒼梧萬古離恨深斑斑竹淚分顏色春風媚草花開

妍東家女兒得夫憐仙都李實同心好西家女兒偕夫
老吁嗟蝶兮爾胡不如古之韓憑妻芳魂栩栩雙飛青
陵樹上枝梁山祝英化形并生留篁隱蕙弄芳不驚層
雲黯黯愁青冥杜鵑血染枝猩猩託命之草胡左行鳥
鳴姑惡難爲聽吁嗟蝶兮爾何不化爲疇桑護穀之布
姑嘯儔呼侶中田徂阿公阿婆安所居道旁葳蕤多藤
蕪巉巉山石徒望夫愁紅慘綠力力拘拘北堂之諼相
依於絲抽獨繭聊爾哀怨抒吁嗟乎陸小姑如夢何傷
飛影孤紫蝴蝶花者女史著名詩孟棠取以名其集漆
園如夢蝶孤飛女史句也李申者謂子和能爲張文昌

之詩亦不幸有文昌之疾信然

道光五年五月張格爾檻送京師受俘禮成多有謂誘
降來京者秀水沈蓮溪太守濂時官比部歸里後有憶
舊一首追紀其事云西師大告捷名王作纍囚致之亦
不遠萬里速置郵前期戒部臣獻俘古禮脩軍容肅司
馬八萃雄貔愷樂競笳鼓金支颺旂旂 皇帝御午
門寶座祥煙浮蟻蝨臣萬計盈廷拜冕旒巍乎霄漢上
仰見雲中樓須臾檻囚至儼然齧觶牛係組在其頸蛾
伏首自投 帝命下司寇瓊瑤倏見收從人禁勿前襍
被嚴檢收其器皆白銀其枕圖如球其鞞製尤詭所利

走沙洲前齒釘密布紛若天星稠後齒跟所站一釘儼
浮漚先由土師訊重譯聲伊優獄成上天子大廷親
鞠求彼猶冀生還謂來獻共球帝曰汝來朝胡爲挾
戈矛汝自外生成高厚不汝留刀鋸及砧鑿緹騎列四
周將以絕梟獍不與常刑侔彙街口貳負肩髀分蚩尤
皇威懾絕域聖武昭千秋殛名骸髑絡召工雕髑髀藏
之在武庫猶漢王莽頭

張溫和詠菊詩十色簾櫳森羽葆一時屏幃下娥皇句
極工麗道光初宣宗巡盛京舉秋獮之典溫和以軍
機章京與隨扈之役有餽生鵝者籠于駝裝之上行御

道旁 宣宗知爲從臣物顧而笑焉溫和旋奉命觀察
轉漕山左洊歷河南按察使皆載鵝以行孔繡山爲文
記之秦宜亭炳文爲作載鵝圖葉潤臣詩鵝籠邀一笑
往事記 先皇蹕路軍容盛關山曉日涼臣原鷗鷺侶
時際鳳鸞翔內史休同語深恩未可忘咸豐季年溫和與桂燕山許慎
生年最高眾推爲三老

平耕煙謂吳蘭雪詩少年沈麗晚境清蒼蘭雪自言作
詩之道不過達其意中之所欲言而止余詩幾於達矣
然猶恨根柢未深醅釀未厚不能有味外味其序宜黃
陳少香詩謂其天資高又銳于進幸勿徇一時之名以

蘄至於古大家之域亦贈言之義也少香工畫有畫所
不能到詩從何處求之句自題鷗汀漁隱圖云漁翁舊
住黃山曲楊柳滿隄波浸渌三十六鷗來往孰殘篷聲
中日又斜船頭船尾吹桃花紅衣畫我釣人槎其二云
紅藕香中花四界小舟繫近闌干外釣亦不得不得賣
換酒前村信權還醉臥明月寒蘆灣釣鼈夢到海中山
詩格於蘭雪爲近

全州蔣玉峰啟敷官江西自縣令至首郡逾廿年有大
疑獄或官民不相得者一以優游平夷循節曲傳者處
之卒以無事芝山亭望湖有千里湖山憑放眼萬家憂

樂自關心之句戊申援例得敘六察 召對勤政殿東
書房吳文節信江舟次寄懷云合并章水屢經年宦轍
君尤在我先三異舊曾傳雒雉五辭今每待犀然功名
笑欲貲郎伍弓冶欣看繼體賢玉笥山頭頻悵望西風
瑟瑟記離筵時令子申甫京尹已官編修也

嘉興朱九山給諫其鎮壬辰授館職後迎養其母孔太
夫人作三絕句示之有瞻雲且緩思親念好把文章答
聖朝及暇日鳳池須記取舊汀鷗鷺莫相忘之句向與
友人結文會於梅屋太夫人有詩勸之句云試看此日
巡檐者誰是和羹宰相才太夫人名昭蕙有桐華書屋

詩集

金山姚古然前樞堅香前機爲聽巖太史元孫並以才藻名於時張嘯山爲堅香女夫爲刻柘湖兩姚先生集堅香觀化三首示張生振簾屠甥鈞云不破疑團念念非靜觀物理悟天機鈍根也有通靈日試看青蟲作蝶飛牆頭薜荔可爲裳絕愛花名種米囊蠶吐新絲蜂釀蜜一般衣食爲人忙機事機心亦枉勞本來成算總難操楊花要化浮萍去不道蛛絲卻罥牢少從王楊甫客揚州得其爲詩之旨旣涉歷艱虞哀樂全集往往隱憂險急其意象哀以傷此三詩爲有閒放之致

邯鄲縣西二十里聖井岡有龍祠在井上禱雨於井取
鐵牌得雨則別製一牌與舊牌還諸井查梅史宰肥縣
道光五年夏遣吏往禱牌至縣三日大雨霑足攷志乘
元延祐間已建祠塋像特不言鐵牌始末旣感神貺爲
鐵牌行紀之云東井鐵星何錚錚早潦敢與造化爭蝦
蟄請雨應龍笑俗物那得知陰晴蘊隆蟲蟲過夏五片
雲不壓清漳城自從改道水東徙勢高土厚窪無坑溝
渠利絕憚修復苦待甘澍方催耕早禾被隴甫尺許豆
苗出土纖枝擎灰飛沙涌百草死晚穀未播閒田平藜
藜腰鼓鬧百面叢祠社鬼爭逢迎縣門十日禁宰割素

衣朝夕多徒行祝史致詞豈不美杲杲但見歆炎精舞
雩禴解一無驗大橫坼兆虛庚庚飛騎忽報鐵牌入近
郭十里聞雷聲焱軒霧駟滿道路弭節已慰憂心憚雲
頭西南轉東北須臾萬瓦皆鏗鳴黑蜮上天肥蠶死辟
歷車鬪蚩尤兵神皋流潤謝元貺三日霑足訓編氓吾
初然疑未深信少見多怪今始驚邯鄲迤西二十里急
裝老吏諳宵征聖井岡記延祐後鹿盧夜轉銀潢橫鐵
牌如符許調水騾綱馱負須兼程牌長八寸博半之上
鐫郡縣當官名仙韶梵曲作導引如有鱗翼隨靈輶或
言神龍澤萬物何勞寸鐵投清泠豈知兩間有至理天

道亦近常人情哀多益寡示調劑挹彼注此權虛盈要
須交質足取信不然尺寸誰紛更五金於法爲水母譬
如勘合供使令疾藜不生亭厯萎迴幹年歲行乎誠作
詩紀實告惇史臥聽殘滴喧蕉栴

顧鄭鄉畫馬贈文鐵仙云知君愛馬入骨髓圖寫龍媒
得神似花驄玉貌青連錢瘦骨棱棱此其是當是從梅
葦尙書出關還京師校書武英殿時作鐵仙畫未之見
也

包慎伯謂孫子瀟詩溺于名津趨時尙徵色選聲以多
爲貴吳中可與言詩者惟蔣澹懷趙良甫能知古法亦

不背詩教而盛稱蔣子延清脆遠俗題畫詩無不曲狀
畫境使人見詩如見畫足與蔣趙二君鼎立子延著有
墨林今話又嘗擬輯江浙布衣詩略示方外弟子墨緣
云胸中不有數卷書畫史庸習安能除重林疊嶂互相
抱要從密處求其疏蓋自道所得也自題破樓風雨圖
云白版雙扉書亦闕連天風雨放晴慳寂寥詩境稱孤
坐四壁暝雲樓半間繩牀斐几一燈紅愁入黃昏雨又
風瓦破七星防已漏急先料理舊書叢樓後樓前竹木
繁隔牆多半好林園雨枝風籜各成響併入小窗終夜
喧巷柝沈沈失報更瓦溝溜急聽逾清殘膏將盡一花

墮何處怪禽嘯數聲穠花賸得一分留

時芍藥始開

掃滌餘

春未肯休況值蠶眠桑爛盡關心不獨替花愁曙影微
茫漏漸殘預愁來日出門難山厨恰已斷煙火且典袷
衣謀早餐

震澤張淵甫丙子鄉舉以教習知縣改官句容教諭十
八年著學箴六則遇不酬學澤不究嗣吳笏庵詩京國
游上才奇士得龔魏淵甫參其間益見所養粹春色映
紫髯仙響振清唳談經已大醕入座非小異中散知不
偶叔度乃無際見之意每消別後心常繫可想見其人
其靜觀齋四圖牧牛種樹停琴掃軌各系以詩亦見志

之作也笏庵壽孫秋士六十二云經術張淵甫古文梅伯
言碩學有根柢二子道自溫君於二子外不浪識一人
柏枏詩文在人口而淵甫秋士世鮮道及者錄此以志
其概

道光癸卯莊桐生輯嘉定詩鈔初集五十二卷二集十
八卷黃鉉樗父爲之刊行孫雲亭布衣績有夢溪詩草
此集未收雲亭常客游燕齊淮泗母老辭歸授徒以供
甘旨錢宮詹常與之游梁山舟學士亦多有詩見贈沒
二十年家貧至不能葬其子墉與吳笏庵相識有詩云
高士無處著隱居東海廬早辭穆生醴力致姜氏魚著

書不求達賦詩聊自娛門有茅容客坐列王褒徒鄉達
稱老友鄰邦慕碩儒錄之以存其人

上海李安之學璜與室人歸佩珊有趙凡夫陸卿子之
目晚歲悼亡困頓以終其題佩珊小影云孝經小學誦
如泉望古常懷鍾郝賢今日流傳風絮句揜君淑德是
詩篇兩家門第舊豐腴轉眼瓶無兩日儲總爲腐儒生
計拙牽蘿賣盡篋中珠梁鴻忘卻青瑣苦轉把青瑣累
孟光吳門吳愈愚
孝廉所贈句佳話流傳愈增痛思君那不淚霑裳
半生俯首伴書傭衰病年來倦汲春留得詞壇題贈什
抵他一軸紫泥封外孫齋曰附羣英應是吾家宅相成

誰料鑒衡堂上語江南女士亦垂名其外孫張桐雋河
南省試房考知爲佩珊所自出也

宗室緘齋恩華官至理藩院尙書有詩稿爲令嗣旌伯
侍衛所刊京師七夕設巧果以麪製象形七爲雲爲虹
爲蝠爲燕爲蛛爲籃皆可佐食緘齋有詩云雲輿鵲駕
接虹橋餽飮瓜筵薦此宵作卜蛛絲耿耿傷離燕羽
夜迢迢刻籃雕蝠皆神肖贈女酬牛久異標爲乞瓣香
伸一拜盤中曾否巧先饒緘齋爲端華之弟敏而好學
退直後輒手執一編撝謙自抑從不以祿位驕人咸豐
中嘗治兵淮徐移軍河朔懷慶被困與訥督部勝欽差

合兵援之詩才清麗不以自矜著有兩漢三國晉南北朝朔閩表推闡精詳考證博洽伯熙嘗稱之

道光壬辰德化李鹿萃協揆以剿連州徭失利罷職戍烏魯木齊先一年方督粵駐兵瓊海平崖州黎而令子東原太史儒郊典試湖北翁二銘相國贈詩有鯉庭曾卻胡威絹龍節還臨宋玉臺之句道光初年協揆嘗督湖廣也協揆由檢討出身賜環後賞編修亦詞臣僅事定海厲駭谷山人志以短于目力不能作小楷困棘闈乃肆力於詩吳仲倫比之於遺山書畫亦擅場題倪文貞畫石張忠烈自書江上聞笛詩冊云靈武靖康不可

爲大江日落寒濤堆攀髯驂龍追帝馭出郭望山遣賦
詩二公心跡揭日月遺墨暗慘生塵埃媧皇束手已莫
補睢陽在圍空自哀姚江堇江水滎迴江頭蜀魄啼陰
霾柳棺雙停無人哭南鎮冬青花又開選聲練色頗能
入微觀姜西溟先生墨跡二首云皇初遠莫逮魏晉難
匹儔猗彼貞觀來褚虞及薛歐斂氣納筋髓神明猶各
酬祖述代多門漸衍肆厥流元祐極英俊敲擊南宮優
說劔非莊美吳興又豔柔寥寥文溪翁仰視雲天悠右
軍本龍虎豪髮嚴飾脩秘笈不常啟公獨探於幽古則
更一擲萬目迴其適非計後人賞庶免前哲羞冥漠張

斯道至美願枉投文章若在世幸廣千歲求入古不能
出偶出便忘歸要如夢中蝶栩栩繞牀飛出時不離我
還來我爲誰旣是當求非欣欣遺其規縱恣由檢束凜
循輒故違爲學斯誠善注目難極窺踰時失所據反覆
更其倪懸心於空際仿佛遠依稀枉同索公臥精微安
得知蓋道所得也

張宛鄰諸女承家學嫻詞翰其第四女婉紉名綸英爲
仲遠叔姊適孫叔獻上舍劼習北朝碑正書分書俱臻
其極仲遠爲繪綠槐書屋肆書圖敘其布指運筆之法
甚詳洪子齡爲作書勢一篇曹艮甫題圖詩云七十二

家篆法在地上碑碣霍荒榛蘭亭玉石用鎮肉牡丹花

賦詞猶新見續文獻通考長安城中運磚甃浮圖矗起千由旬

見宋史豈無蒼舒藏墨蹟臨本莫辨贗與真平生不善徑

寸字凡將急就安敢論往者河陽考金石驪駘見魏碑司馬景

和誌剗纂司馬元興誌銘多異文中候從事碑久佚漢郭仲奇郭究二碑

集古錄隸釋云在河陽今之孟縣也經幢鐘識徒紛紜己丑客孟縣輯河陽金石錄二卷

婉紉夫人有殊稟少小即與翰墨親賣竹漉籬勝雲照

龐居士女縣衙日永娛諉椿綠槐陰濃覆書屋指搗栗

尾驅龍賓挽底雲虹森照爛行間蘭麝飄氛氲用張彥遠評書

語鉤陽距陰法已備橫逼外鼓勢益振韓公授書奚足

道蘇蕙織錦非其倫有如木蘭從軍去長槍大戟驚
羸如馮夫人持漢節胡沙漠漠馳雙輪端嚴道麗力深
厚其弟仲遠之所云吾家賢媛著名譽楷法頗亦誇朝
紳謂族姑墨琴夫人不論姿制論格勢相去毋乃隔一塵頗能
道書中三昧張石舟詩少讀儀徵書物識北碑派魏齊
尚根節晉宋俄稊稗中原戎馬際刻作仍整邁南帖例
北碑一拙一狡猶可與良甫詩相參證也

曹良甫廉訪與吳門後七子及蔣澹懷褚仙根爲十子
魏默深謂似玉溪咸豐辛亥以給事中監試秋闈翁文
端贈以詩云與君共識煎茶意面目森然活火調祇見

魏徵殊斌媚不論汲黯與寬饒良甫嘗劾術士薛執中
也去井陘三十五里舊關一名故關俗呼北天門又四
十里西天門去北天門五里固關重巖疊翠壁立摩天
井陘志言古井陘口卽今固關良甫井陘關詩有云五
更雞唱使車行獲鹿東來第一程大將英威漢旗鼓嚴
關形勢趙干城故固同音圖經未之分析良甫曾於西
韜日記中辨正之見題葉潤臣雁門策馬圖詩注蓋故
關在獲鹿界固關距平定州治九十里乃明正統時所
置

蔣申甫泛舟誠園句云漫天柳絲寬刺水新蒲短右安

門外頤園爲述堂司空誠端別墅甚有水石之勝酒家
賃地設肆易名嘉燕山亭道光乙巳陳頌南給諫歸閩
中潘季玉招同羅椒生趙伯厚何子貞莊衛生翁藥房
朱伯韓吳清如蔣心香楊墨林子言昆仲飲餞於此頌
南有詩曹良甫次韻所云城南有別墅可比祝氏園者
也墨林郎中名尙文靈石人刻連筠篴叢書禮張誦風
爲庀其事祝氏園爲祝御史別墅國初往往
襖集於此乾隆間已不可考矣
寶山印康祚有鷗天閣遺箸湖田記游云解識風雲我
黨狂行蹤不似住金閨杖頭擔得青蚨百六姐墳頭喫
酒孃曹良甫詩朱西沈雲門士聯吟記昔年春游擔得

杖頭錢也從六姐橋邊過不見詩人印印川書遺箸後
作也

劉寬夫太守素奉佛精通內典兼工繪事得謝文節橋
亭卜卦硯作拜硯圖與韓小亭均以博雅多收藏稱於
時小亭以農部出守潼川寬夫招同梅伯言戴雲帆何
子貞趙伯厚張石洲曹良甫爲之祖餞飲饌精富良甫
詩所謂招攜每費十人饌羊腔鹿尾家庖治者也嘗以
閏五日集龍樹寺吳冠英爲之圖想見佳游勝引盛極
一時喬鶴儕吳竹巖黃子壽皆寬夫壻當時金石學盛
行葉東卿與寬夫號精鑒別彭文敬亦頗收藏篆隸碑

版松風閣詩鈔中有金石詠絕句三十五首

賈公彥周禮疏節氣有入中氣法中氣無入前月法道

光壬辰除夕雨水鄧嶰筠督部詩云遺編檢月令仲春

始雨水啟蟄在正月西京尙爾爾雨水正月中蓋自四

分始說見錢氏三統衍術沿之越千載積算如黍稊朔中或不齊

先後數日耳今年值茲辰乃在丑月裏年方除夜殘斗

已上元指酒因餞臘傾風可試鐙儼數逾三五強故事

闕經史中氣入前月古法安有此我朝盛作述精蘊探

數理置閏象歸奇推步邁周髀自營室至奎一一叶星

紀紀事題新詩龍飛歲癸巳

黃勤敏里居道光庚寅夏間 宣宗賜詩有縈懷江上

思儒雅煙雨招吟逸興迢之句張詩舡繪圖賦詩郵寄
蕪湖勤敏及許慎生祁春浦均有和章公子小田禮部
富民亦次韻同作小田以拔萃科七品小京官勤敏八
十生日蒙 諭作爲主事歷遷郎中提調春闈提調例
用甲科有詩云也辱丹豪同點注頭銜如此稱還無已
亥歸省勤敏薨後遂不復出其讀元白長慶集元競渡
詩壯哉龍競渡一競身獨尊白點額魚云見說在天行
雨苦爲龍未必勝爲魚可以觀二公之用心因吟一絕
云掀髻自詡近天闈壯氣惟誇競獨尊嬾惰游魚甘點

額愁君一眴下龍門元居相位三月卽罷固不如樂天之青山獨往也

甘泉吳少文居士康幼多疾不能應舉子試居與白茆湖鄰築草堂棲以終身與焦里堂共晨夕言學問梅植之稱其詩冲和高閒義常理深弔里堂並令嗣虎玉云
嬾踏春明逸興賒懷鉛握槩老窗紗別開生面吞三畫
獨具靈心創一家扶杖時迎人乞米開門不拒客看花

胸襟澹蕩如湖水贏得通儒四海誇

阮制軍撰揚州通儒焦君傳醫

藥雖知病已深一時回首渺難尋檻花春放空迎月亭
鳥宵歸莫聽琴軼事尙傳田父口遺編猶入相臣心

英尙

書索葉
遺書

最憐今日淒風繞又見佳兒別故林煌煌著作
疊空箱齋恨泉臺去太忙死不忘親無媿孝生能承業
自餘芳一門風雅推吾里兩代淪亡慘客腸遺跡尙留
茅屋壁欲看先覺淚沾裳虎玉曾爲作白茆草堂記也
五言律句如潮聲寒入夢山色遠依人掃石憐雲去開
窗喜竹生屋向春前葺花從雨後分破垣通竹徑飢鳥
上琴牀尋碑僧引路采藥僕呼船敲碁驚鶴夢掃地碎
花陰殘花遮塔影密竹隔溪聲買硯添新債看花減舊
愁興閒惟對鳥貧慣不求人置之一鳴集中當無溜瀝
之別

貴池桂丹盟以癸巳進士作宰畿輔游擢名州林文忠
見其日記以爲可入資治新書分巡漳南引疾歸文忠
有吾鄉有好官而不能留之語同治紀元起權閩臬左
文襄奏入循吏傳其辛酉夏中思江浙潰敗之由成詩
五首謂己未夏五過常平太守告以浙撫胡興仁劾鄭
提軍魁士交何宮保察看余言鄭公向不相識當鄧提
軍戴鎮軍失陷之後來收潰卒戰勝得全厥功甚偉今
過東壩訪聞兵勇秋毫不犯民甚愛之斷不可動至舟
中又以此人去留實關大局復致函丁甯不聽移石埭
守將周天受于宣逾月石邑三營覆沒三十六將淪亡

涇太廣德旋失宣徽資浙餉繆都轉葉觀察謂應解有
處分之餉徽宣無處分且緩杭破二君皆死和帥與何
帥商支五十萬餉進奉以後四十五日發一月餉尙未
進奉爲賊所有云云徐清惠宗幹序謂其詩文不爲空
虛無實之言

蜀主孟昶生日道士張素卿來獻八仙圖八仙者李耳
容成董仲舒張道陵嚴君平李八百范長壽葛永瓚也
見黃休復茅亭客話今所稱八仙略見陳仁錫潛確類
書亦鮮所考信嘉興徐可叔明經有長歌辨之可叔幼
卽嗜詩始署曰小蓬壺詩繼更小青藤館晚乃定爲得

酒趣齋與詩娛室主倡和尤契雅善各體書精鐵筆卷
未附硯銘皆手自奏刀者生乾隆丁酉歿年七十一食
蟹詩自注云乾隆中郡東奚家橋酒肆有朱二娘者能
剝蟹脫內外甲而蟹全酒人誇之爲芙蓉蟹先大父苻
塘漁唱中有句云兩頰桃花朱二娘調羹和汁客爭嘗
纖纖巧擘芙蓉蟹近口涎流玉筍香自注二娘美而貞
錫可謂得此注讀漁洋山人集者當不至以紀阿男爲
疑亦禾中談助也詩娛室卽事示可叔云涼蟬唱罷最
高枝小巷無人日暮時細雨卻從湖面覺榆陰如蓋立
談詩

曹諤庭給諫入臺當 高宗初政上疏謂當今督撫明
作有功之意多愷大成裕之意少損下益上之事多損
上益下之事少從子劔亭副憲劾奏和珅家人劉全不
法兩世以能諫諍顯名家有一夔用以焚諫草者朱山
人鶴年爲作字夔圖副憲之子江字玉川朱南厓相國
姪女孫壻也道光甲午鄧嶰筠尙書爲題字夔圖云君
家空堂四壁立忽睹堂隅黝光動短脰詰詘亦鳴大
腹彭亨鑿猶洞摩挲辨是百年物看君雪涕談方縱爲
言兩世諫草焚史稿蕉園差與共厥初嶽嶽黃門公桓
典立朝驄馬鞞戴冠無慙鐵柱望問夜頻驚玉珂夢尙

書易象經紛綸封事居然成古諷旨哉斯言括萬有深
文小苛詎阿眾宣德當思飲以醕任重惟求厚其棟蒼
鷹迴眸絕凡睽威鳳蜚聲無俗哢蕙鄉歸權家具攜蕭
寺虛廓康瓠空一重公案託禪悅幾載巾瓶隨梵誦黃
以賽寄憲臣世閱繼清風驂服後先相縱送已薄功名
思抗疏豈有文章甘覆盎盈廷共數黯性戇閱世方知
賜言中炙手奚辭丞相嗔冰山旣倒儉人慟青瑣故物
浦珠還埏埴由來悟冲用矜異非關銀鑊賞瑰奇何必
琉璃貢文字緣深脈望魚絲綸恩湛觚稜鳳銅臺藏墨
未爲珍鐵限退臺安足重劫灰或許胡僧識窳藪徒令

舍人痛楹書能讀嗟君賢抱器長存亮無恐癸彝乙鼎
互焜耀更誦清芬示羣從子子孫孫永用之瓦釜毋同
五都闕玉川與張茶農阮小雲夏慈仲善慈仲詩飽嘗
憂患出忠門萬里歸來意氣存分與畫叉錢幾塊高花
入座侑清尊蓋 仁宗親政玉川被恩蔭爲中書轉大
理寺評事充 高宗實錄校對官以書縫有譌字免官
發新疆道光元年釋回仍用中書除安慶同知兩攝府
事慈仲嘗誌其墓

壁星泉尙書精八分凡有營造以尺紙畫圖結構精絕
不差豪釐邵沐生少宰贈句云索靖工書千管禿張華

縮地一圖開

吳江沈日富字南一有受恆受漸齋文集陳梁叔寄南
一詩齟齬接塵鞅刺刺孰情好豈伊土淺窳得氣乏聳
隋夫已誤紛隨戀物甘枉撓天和矧交戕外縻中已耗
君也器明瑤粹美持雅操郡城燈火夜酒市乘雨到高
談驚特起四座羅喧噪文辭各鳴胸天風噓萬竅志潔
言始馨道貴領其要其文品可想

松圃大令鶴齡先世爲將門壬辰釋褐作令廣西蔣申
甫龍翰臣皆其分校所得士粵東逆匪竄擾賀縣松圃
登城固守散私財團練殺賊無算會武弁同城者奔潰

力盡死焉事聞得 旨褒卹張培仁詩生天證慧根平
賊慰家祭謂其篤信慈氏也

管孝逸繩萊爲韞山侍御孫道光六年任含山捐資力
修隄堦城內市河淤塞深溝而達之江裕溪口米商困
於市規立石禁絕之宋于廷贈以詩云歷陽亦巖險設
縣匪自今子已來五年治體良可尋灌漑足下農華實
被子衿乃信抱才智百事靡不任世情方變詭所守在
影衾摯獸尙可縛溪淵則已深且屈百里間悠然坐鳴
琴我本有夙願相期在同岑擇肉愁閭閻烹魚戒釜鬻
民生寄令長紛紛笑朝簪摯獸句謂有狼食人爲文禱

於神遂捕絕之平仲才叔其二子也

同安呂西村孝廉世宜號不翁道光壬午舉人居著書自娛不妄投刺精篆隸有盛名漢碑縮本尤精所謂四十九石山房是也所著愛吾廬文鈔筆記潘鄭會師刻入滂喜齋叢書枋橋林氏復刻其古今文字通釋嘗署齋壁云讀書宜略識字立品只爭爲人陳頌南稱其筆記比之桂未谷札樸楊雪滄謂其隸書大字如張公去思碑呂孝子碑與漢人楮葉莫辨小字如四十九石亦不讓魯公小麻姑壇鷺江感舊詩云不惟滂喜訪遺書尺素零縑更起予絕好鄙君神筆授一生低首愛吾

廬謂其得力於鄱君碑與楊宗闕也

歙縣王子懷少宰茂蔭之祖母方太夫人年二十七歲而寡守節撫孤凡五十八年方嚴剛毅動循禮法翁二銘相國詩所謂文孫睠慈範僂遺訓遵立朝惟謇諤矢志存貞純者也少宰由農曹洊躋卿貳廉靜敢言咸豐朝疏爭士子捐納舉人生員無益目前徒貽譏後世又極論銀票虧商銀號虧國之弊奏陳大錢利弊極言其虧國病民而請緩幸圓明園及省躬克己其樞則繫乎用人聽言語尤切直

趙甌北那繹堂均有內簾諸詠海豐吳竹泉吏部侍曾

有外簾八首云棘闈卿月有輝光明遠樓高控院牆號
列東西尊北斗簾分內外鎮中央大官供饌支頭等小
吏傳聲立兩行自是掄才闕鉅典夜深猶坐至公堂
列坐巍然獬豸冠防維從古借臺端龍門按簿稽名細
魚貫循行亂號難約法章頻超漢制族談禁更仿周官
由來課士深巖地賴有森森鐵面寒監試紀綱誰領簿書
繁律例條條京兆存納卷已先司士籍出闈獨後絕羣
喧鷓行賓侶推東道魚鑰深沈護北門卻笑看人種桃
李白收落葉到黃昏提調三條燭盡漏聲殘交卷紛紛出
柵欄郎署官剛容一坐禹門浪已擁千攢照籤未領頻

頻喚貼例先防細細看此役過多功最少況兼幾度廢

晨餐

受卷

莫厭多方令甲重糊名例最重彌封冬烘頭腦

猜難著姓氏親朋辨豈容隱隱崑山藏玉石茫茫大海

混魚龍憑教握尺量才者摸索都從暗裏逢彌封珠玉泥

沙卷幾千易書後便判人天純青卽是成丹候欲赤何

妨近墨前絳帳應愁迷目易朱衣恰是點頭便只憐無

數鈔胥苦五夜燈紅滴露研

贈錄

可是然藜夜校書伊唔

坐對一窗虛荒偁半已成燕燭訛字猶爲辨魯魚文到

驚人空擊節語堪捧腹且軒渠如何筆染鷲黃色疑取

梅花點額餘

對讀

籤分南北按房收堆案時如束筍投未

許別裁區贖鼎先教朱墨劃鴻溝我空守墨盈千卷誰
定出藍勝一籌就裏升沈緣底事煙雲過眼總悠悠收掌
孔繡山家與方氏世爲婚媼繡山續娶珊卿安人爲恪
敏曾孫女道光戊申五月繡山來白門僑寓承恩寺僧
舍珊卿弟子俊常來談詩攜繡山對嶽樓詩歸握其前
後葉僅留數行雜以他卷給珊卿曰此某君詩姊視之
何如珊卿素喜評論詩詞遂讀之曰此清才也子俊乃
釋卷大笑繡山旣就媿宮保第子俊始以語繡山湯兩
生聞之笑曰何意能得此評誠閨中知己也遂爲作卻
扇論詩圖繡山題詞云卅載詩名媿選樓論詩那得附

清流無心題品成佳話也擬仙人許狀頭幼小常依大
母慈宣南曾記見丰姿那知十七華年後綠綺窗前共
論詩阿弟清名重玉臺一編賺得品評來謝家詠絮尋
常事更擅詞場挖雅才知己生平幾鉅公賞音今更屬
闡中豔傳卻扇論詩語合借龍山畫品工

徐星伯恩福堂詩鈔題詞云讀詩先論世貴能識所遭
不以夷險易由境觀其操是非全乎天湛然心不撓誰
歟涵道力吐屬規風騷吾師今玉局江海同遊遨不嗟
節候異攬物仍含毫一賦破鴻濛凌轢班馬曹傳鈔徧
絕塞紙價爲之高偶然紀短什豈屑爭詩豪忘機得種

菜遣興偏題糕飄然四適詠樂意欣陶陶一編與古會
歡醴鋪其糟聯吟到斜川析律精牛毛焉知千萬山雪
虐還風饗恨我失追隨莫効負笈勞空驚未見書諷詠
心慄慄星伯詩不多見江陰繆仲英觀察特錄於所著
詩話中仲英道光辛卯入都嘗從星伯受業於國朝人
服膺初白又嘗謁見李申耆於輩學齋其雲樵詩話二
卷戊午正月令子藝風刊行所標舉如金樹本曉起云
案頭一翦玉槎枒細細寒香透碧紗侵曉膽瓶冰似鐵
自吹松火暖梅花宋大樽逢金大作云酒徒零落渺何
之獨向春風把酒卮今日花前莫辭醉相逢不是少年

時宋咸熙贈余道士云往日雄心莫漫論老耽幽寂棄
兒孫四山風雨不知處虎尾如人夜打門柯萬源臨平
道中云水濱花傍夕陽明漁艇爭喧趁晚晴著眼好山
青兩岸亂泉聲裏過臨平陳文煥七夕云銀河耿耿路
迢迢今夜雙星渡鵲橋何事倚樓人不寐涼風吹過一
枝簫馬元勳初夏雜詠云金色黃魚雪色鱗販鮮船到
五更時腥風吹出橋邊市綠貫紅腮柳一枝皆極有風
味

文信國與府理錢昇文劄子墨蹟爲其裔孫其蔚所藏
永豐劉詹巖修撰云此書本集不載公景定四年除著

作佐郎二月兼權刑部郎官八月以董宋臣復出爲都知上書論其惡不報此書當是是年所謂奸腐復用卽指董也其家藏遺像有康熙乙酉藍岳讀書螺山謁祠絕句一首蓋明人鈎摹本

顧澗費嘗病今世通行本伽藍記綱目混淆子注屢雜錢塘吳次平若準本劉氏知幾之所云重爲分析復參考諸書成集證一卷圖一篇曹良甫有吳孝子詩爲次平侍御尊人作一首可略知其家世焉李若農侍郎云楊銜之結銜稱撫軍府司馬吳氏此本集證引法苑珠林作鄴都期城郡守足廣聞見以余考之則銜之終秘

書監北平人也見廣宏明集第六卷史通作羊銜之當
是傳寫之誤通考又誤襲之耳光緒癸卯義州李氏說
劔齋重刻是書凡集證已出如范明友作友明高貴鄉
公作高貴卿公祖瑩作祖榮雖灼知其謬俱仍之以存
其舊集證不出庸是梓人之誤則元又徑改元又集證
高貴鄉公誤作貴高卿公則貴高互乙而卿字仍之其
他類此蓋其愼也

銘東屏嘗教讀於煦齋協揆第子受翰林其弟子也協
揆以萬年吉地事下獄公子皆從之惟子受在家協揆
謂子受曰勢必鈔家家中絲粟皆國恩母許隱置隱匿

則請於朝殺汝子受悉出所有於廳事部署未定而命
下提督者英至門怒厲中有喜色問有先生否其家以
東屏及常州二客告二客者常州孝廉以知縣謁選主
講於協揆第者也則命其從者曰三先生佳屋不許動
揭於戶蓋律例查鈔之家館師不與者英於是親行搜
檢至廳事見金碧輝煌色動有羊脂玉搬指十極精攬
而納諸懷從人遂肆取無所忌常州二客亦從焉東屏
之僕趨而前東屏呵止之閉諸室中不令出日夕喧囂
定僕出曰彼二先生皆官也而所得甚夥主人貧徹骨
而絲毫不取豈有說乎東屏告以得此財必獲天譴僕

且笑且恨而去常州二客不及一年死矣東屏與吳稼軒善每爲稼軒言之以謂小人傾陷君子大都不遺餘力天道好還理無不報而報常緩若乘人於危而取其財則其報常速然如者英陽諂事協揆而陰搆成其禍又利其所有今尙隆隆炎炎豈報施之道或爽乎稼軒紀其事以爲與洪北江所紀毛海客事同東屏爲有用之學宰鉛山刺甯都權守廣信有政聲性落拓不羈好飲酒善琴精篆刻嗜金石古器蔣劔人爲序其從軍紀事詩始於潯陽感事旣而從戎白門籌餉漚瀆駐曲阿移京峴稱其有合於少陵詩史之旨自吳入杭嘗與劔

人汎湖作琴會同治初杭州陷及於難稼軒歎其義烈亦似海客云

彭文敬爲芝庭尙書曾孫早歲與朱酉生沈閩生沈蘭如王井叔吳清如戈順卿稱吳門七子以舉人中書值樞垣成進士歷部曹累擢通副始以班大九卿不入值咸豐紀元復以侍郎領機務不由翰苑而延登端揆與嘉慶朝章桐門相國由中書舍人入直樞廷洊擢綸扉皆異數也文敬乙卯拜參知宣麻數日卽奉經筵講官之命同時文文端與葉崑臣兩相國卽眞揆席崑臣與文敬皆文端乙未禮闈所取士同領鳳池距釋褐纔二

十年祁文端和文敬紀恩句云師弟同時三獨座拜颺
浹日兩恩綸文敬丁巳歲暮懷人句云戴逵求死應同
臧蘇武還鄉未有期爲葉作也葉與沔陽陸立夫皆負
才名膺倚畀晚節皆飲恨以死而文敬以恩禮終與壽
陽相國共事密勿嘗同寓金鰲玉竦橋西多倡和之作
壽陽贈詩有論事不阿存心獨厚之語其名德蓋亦相
埒焉嘗疏請三旬萬壽恩科庚申六月萬壽聖節奉敕
近臣子弟入同樂園觀劇彭季子祖潤有恭紀詩許海
秋詩所謂 皇帝未北狩舉朝方晏然魚龍戲曼衍拜
手觴萬年者也

燕龍圖肅謂潮汐爲元氣升降浙江明潮爲海口沙澗
濁浪推滯明以前錢塘江皆自龕赭兩山間入海所謂
浙潮門戶也龕屬蕭山赭屬海甯 國朝海潮北徙由
赭之北以行逼海甯經巖峯山尖山之間謂之北大壑
河莊去龕山三十里河莊巡檢舊隸海甯署倚赭山今
赭已入蕭官民往來隔江不便嘉慶十八年始奏移巡
檢并其地錢糧亦改隸焉山會蕭餘上五縣海塘江塘
五百里凡六萬餘丈道光十五年烏敬齋中丞奏蕭山
南沙正與北岸海甯塘相對蕭沙日長則逼潮頭直搗
海甯塘請南沙紅綾以外永禁佃民圈堆淤岸任其自

漲自坍并每年三月委大員勘拆一次徐鐵孫詩沙腳
防南漲潮頭久北旋祇憑塘保命莫與海爭田詠其事
也考雍正十一年 世宗諭勘海塘大臣如工程永固
可保民生卽十萬帑金不必惜費道光十四年發帑大
修並留二十萬金發商生息以供歲修之用所以捍衛
政源者至矣

河內李文清自治刻苦嘗手鈔湯文正公全書乙酉視
學滇南遇佟敬堂先生景文與之講論益究心程朱之
學辛卯分校鄉闈翁文端贈詩云十載鷗盟氣誼深輸
君萬里快登臨兩川文物花如錦六詔清才竹似林歸

日輕齋餘款段中年道力更深沈蘇門正學今誰紹與
子同懷仰止心咸豐紀元以太常家居曾文正嘗薦其
堪備日講同治壬戌召入都擢尙書直樞府嘗因進講
治平寶鑑漢文帝卻千里馬事推言人主不宜有所嗜
好以啟窺伺之端其獻納多類此也孫續午年少無賴
以職官糾搶德人之無後如此

利津李仲敏佐賢戊子省元乙未館選由編修出守汀
州引疾歸里不復出著石泉書屋類稿古泉匯書畫傳
真有愛畫何妨如好色編詩敢詡己名家及邇來泉幣
新成譜張台顧烜陶岳洪遵或頡頏之句與吳子苾閣

學同譜相友善閣學亦篤嗜金石書畫有同情也

皇清地理圖李申耆辨志書塾刻本董方立手繪也東
盡費雅喀西極蔥嶺北界俄羅斯南至于海詳考經度
自乾隆以來州縣之改更水道之遷異皆參校確實以
道光二年爲斷申耆復加參訂分爲四十一圖鑲版以
廣其傳朱寅庵詩莊叟從來亦妄稱太倉稊米見何曾
笑他章亥徒虛步造化由來有準繩禹迹如今幾變遷
黃流東驚最茫然汴淮千載嗟三奪立論空懷邵國賢
萬里岷嶓指掌看參詳六體豈無端晉裴秀九州制地
圖論一分率二準
望三道里四高下誰親博物羅方志土會由來列大官
五方邪六迂直

玉門三道接冰山
天馬葡萄入漢關
四萬里中頻指點
十千戈壁隔諸蠻
樂浪元菟漢東邦
鴨綠圖們限兩江
白岳波州春縷縷
浪傳名物到書窗
二勞飛景望琅琊
舊夢如今霧裏紗
誰過潮河踏塵海
披圖風雨捲林花
咸豐丙辰胡伯薊
復改爲書版之式
刻於廣州

劉孟瞻懷人六絕句
效少陵存歿口號云
搜羅寶應圖

經富楚楨輯寶應圖經
續補延昌地志詳平定張石州著
元氏魏延昌地志

甘棠誰薦達石州
宿草劇淒涼
丁鴻豪健才猷懋山陽丁儉

卿究心桑梓利病
見所著石亭記事
姚信凋零樸學深旌德姚仲虞深於周易著有一經廬

叢書多口未妨稱國士
苦心何處覓知音
柳氏文章師子

厚丹徒柳梅君詩筆勝都官江都梅蘊生一經行世迂

迴待賓叔精於穀梁春秋善書七種待刊片石貽孤鄭重看蘊生家藏唐貞元田府君

石五色明珠輝璧社高郵孫彥之與莘老同族編四書說苑九苞威鳳耀

河東甘泉薛子韵系出河東著說文答問疏證文選古字通等書珠光久照人將老

鳳彩先消遇最窮廣文有道官偏冷歙縣閔子敬官全椒學博有古君子

風公子多才命不猶歙縣洪子駿為桐生師嗣子苜蓿闌干情自適

芙蓉搖落稿誰收子駿工詞有殘荷詞尤佳今遺集不存大包君與小包

君講藝談經迴不羣涇縣包季懷撰毛詩禮徵其族子孟開治公羊論語之學鍾阜

孤墳悲夜月季懷葬江甯金臺旅館悵寒雲孟開客京師館於呂鴻臚宅

時道光庚戌劉楚楨方宰元氏也彥之名應科與其兄

應嘉有天心閣合集孟開名慎言孟瞻又言子韻處困
績學汪小城力疾著書俱不永年小城名穀歛人隸籍
儀徵好輿地之學卒年三十五儀徵又有方端齋文學
申初爲人傭書孟瞻與楚楨勸習制舉業年踰五十祁
文端督學以經解見知試律以人間重晚晴命題爲端
齋發也著有諸家易象別錄虞氏易象彙編周易卦象
集證周易互體詳述周易卦變舉要是爲易學五書

喬勤恪尊人潛泉侍御邦憲動作必於禮法掌刑科時
居延旺廟街南羅奇疆數十於廊廡顏其齋曰拜石翁
文恭師詩所謂試問長安客誰知紗縠行卜鄰吾對字

拜石舊名堂也勤恪官都水曾典試湖南以隨杜文正
查河留江蘇自典郡游擢開府同治戊辰移疾居泰州
閉門著述有緯廬及摩蘿亭札記緯書自孫子雙古微
書外俟官趙在翰鹿園緝七緯三十八卷七緯者易書
詩禮春秋樂孝經也鹿園采集各書標所自出多附考
辨專主鄭學較孫氏之書爲勝金山顧尙之復刪所未
當補所未及爲七緯拾遺

良鄉宏恩寺住持三覺 聖祖召見大內用儀仗送歸
相傳爲明莊烈帝第三子道光初鄭慎親王往還易水
寺僧每道其事有詩云熙朝恩澤及枯禪儀仗歸來見

往年刺刺老僧談不倦史家遺事要誰傳嘗置田於樓
桑村爲漢昭烈故里斷石小桑僅存遺跡而已

湖州俗重蠶桑鈕西農同守福疇有育蠶詞四十首徵
引張炎貞烏青文獻王道隆菰城文獻陸詠吳下田家
志烏程劉志胡志勞志鄭元慶湖錄費南輝西吳蠶略
謝肇淛西吳枝乘譚貞默著作堂集俞宗本種樹書徐
獻忠吳興掌故集韓氏直說務本新書前溪逸志閔光
德東林山志於絲枲事搜采頗詳吳胥石吳蠶六十韻
云吳地分星野蠶功任土宜閭閻常竭作妾子寔專司
敦本農偕勸躬桑母是儀龍精仍變化馬首更權奇好

繼西陵業還賡七月詩煙村何悄悄晴晝正遲遲槐火
清明換錫簫斷續吹新萍香掩冉細麥影參差粉社觴
浮蟻茆堂薦伏雌大昕曾賜浴曲植況先治爆竹多禳
虎彎弧亦禦魑辟人聲人標片紙卜宅襲重帷鞠育藏於
密網緼數旣滋辨名區庶類善頌諱織疵蠕動方嬌怯
鴻毛效指麾凝神蝟掇僂學視虱縣釐柔葉聶而切遠
揚斧以斯舍西芳逕遶牆下綠陰垂翦想金交股鉤憐
桂折枝中阿勞弭節干騎漫陳辭芣芑婦人樂殞繁季
女口拈花嫌稚叔摘椹媚佳兒待哺怒如擣加餐喜可
知勤施兼穀食穩送比牛飼彌覆天垂象平均風美鴈

聞馨從臆蠻染指劇委蛇乍擬蟲鏞柳旋成馬踏葵飲
河憑偃鼠遷蜀爲蹲鴟一飽生涯遂三眠物候移形神
殊磊砢稱驗較銖鎰駒隙行將逝菟裘堪自怡須教蝸
縮殼彌信豹留皮若輩宜高閣先人有舊貲蘆簾鋪帖
妥藁束接崇卑督力爐添獸威姦廡繪狸紕雙覘合志
蛹獨耐抽思炎帝乘新令薰風近曲墀絜尊老婦祭增
竈族人炊揚沸煎何急親纒樂不疲引繩成就理轉轂
乃從維只費纏頭物空存走肉屍保民煩尹鐸抱布刺
氓蚩幌氏凍諸井青州貢並絺焚機眞魯相恤緯歎周
嫠比素靡蕪句回文蘇蕙詞璇宮禁寂寞鮫室鎖淪漪

復訝神鍼運甯愁拙目嗤元黃才試染刀尺未停披給
服象天祖垂裳傲燧犧王言宣誥敕國事別旌旗加璧
朝尊德承筐宴示慈未多青罽段休羨紫駝尼託業聊
泚澣安貧復縞綦大哉功必徧允矣利兼資果碩不終
剝瓜繇會有期留良徵犢角繼體得蛾眉纏縛誠膠固
行藏孰挽推翼成還掘閱物化等斯彌訢合婁豬定馮
生燕卵遺卷懷終養悔閔鬻待來茲胥石篤古博聞其
詩亦卓然成家於蠶事可謂閔括無遺矣

太倉南園爲明王文肅別業吳駿公所爲賦琵琶行也
向爲名流觴詠之所乾隆間族裔竹娛卜居於此嘗集

南園風雅一編繡雪堂有董華亭話兩題壁及陳眉公
諸人倡和詩廊壁墨池二字爲米海岳書係弇山園舊
物道光丙申徐秋士葺而新之與沈滄洲盛蘭雪倡和
其中有南園秋社詩一卷蘭雪爲畫南園圖多蓄古鏡
作銅僊傳一卷嗣孫元穆并刻入蛻學翁遺集中詩宗
王冰庵唐石君宰白水有惠政祀名宦東湖懷古云漢
川四月黃雲秋榴房拆錦波如油子真谷口草沒馬漢
王臺下颿行舟東湖千載有陳迹雉堞深圍一隘碧臺
榭空留放鴨闌游人少駐聽鶯屐當時太尉乘一麾百
頃鑿破青琉璃八年五馬避貝錦畫船簫鼓隨娛嬉談

兵幕客忽星散敗荷葭葦徒紛披靈武詔書傳冊寶蓋
代元勳知者少祇有詩人泣斷雲西池一例埋荒草鵝
黃酒熟山店家鶯黃酒出漢川以房公得名抱琴有客來看花哀絃
自迸雍門淚悲風莫說陳陶斜

涓川縣東十五里朱曲以宋行人朱少章寓此得名又
名張場以明人張森官此得名實古東里也場北東里
岡上有國大夫祠新鄭東里亦有國大夫祠徐鐵孫謂
新鄭古鄆國地此爲是也其涓川道中詩云東里風流
德不孤張場朱曲任人呼欲知遺愛今多少兩地猶爭
國大夫

家玉峰尙書武達文通其還硯事已見三集子晏字方
洲爲年中丞遐齡壻由武曹官至湖北按察使孫銓念
園預乾隆干叟宴有得樹軒詩稿曾孫書績杲樓有還
硯齋詩稿杲樓次子仲驥司馬超格有穀香堂稿無挾
齋詩草三子簡侯方伯有歸硯齋詩賦草海天集官翰
林以大考遷官至中允嘗繪玉堂種竹圖仲驥子曉村
太守乙丑以第三人及第宗湘文爲仲驥題遂園圖云
早識先生天趣賒不撓塵網樂桑麻季方欲雪西陲鬢
霸子偏簪上苑花禹穴憑瞻新廟貌聖湖猶識舊煙霞
歸心漫共梅爭發老圃垂垂影未斜時仲驥游浙將歸

都門而簡侯罷江藩後方陳臬甘肅旋又以屢劾驕將
罷官子子通先生儒丁卯舉人工分隸亦能詩

甘泉黃氏家世殷商右原郎中爽由諸生賜舉人援例
官比部少游江鄭堂之門嗜學不倦刻有漢學堂叢書
鈕非石顧千里皆與之交弟冶原名錫麒彙朋友詩爲
蔗根集張石樵爲選治原詩附焉

提牢於刑曹爲劇要年勞例獲優敘列上考率擇資陳
堪任事者先記名擬陪後始擬正滿漢二員五日一班
遞年更換先一月報滿題補道光戊申合肥李玉泉比
部職是時有貫垣紀事詩一卷中如每晨頭役參報平

安並呈病帖每夜驗封辰申放飯必冠帶定制日入收
封暑月差晚九月放給棉衣由堂司捐製每囚日給米
八合工部頒發銅勺每飯一勺囚糧煤炭片付陝西司
行文戶部支領冊送河南道御史查核每月御史二員
查監一次醫士米銀付福建司囚衣付廣西司荷校人
犯口糧該司付廳支領八月底朝審前一日堂派廣西
司監給赭衣邊犯刺墨各司提審有手票帶差之役則
遞班司獄司獄謂之內廳北福南祥八人輪班不出中
門隸役百二十人逢五十日二班更換洗晾薦席灑掃
屋院更夫三十六人鈴柝巡更籤十六支諸囚收監時

自掣分南北兩所共九監口謂之老屋內有更道楊忠愍公祠內圍官犯比屋而居夜俱佛號已定案各犯初二十六日例進家屬各監有下院以備情話遣犯由中門傳呼以達監所囚准薙髮者仍留一片由朝審至大差重囚併入現監各監院門一道獨女監二道監各起小樓留天窗透氣夏開冬閉每監外有捲柵三間地略起高臺爲夏間乘涼之地各監例給冰塊焚柏枝蒼朮辟惡四時備辟邪香及藥料秋間鋪墊草苫三冬加賞湯菜大雨積水捐設橋板歲底行文工部圍牆換棘一次凡提牢職司各綴以七言絕句一首足見國家立法

之嚴待囚之寬其阿園綠竹一首云正直爲人正直神
專祠尊俎合千春園中萬个猗猗竹猶見當年德意新
阿園者滿洲阿世圖國初司北監歲除縱囚歸如約一
囚家城外母病遲之城閉旦乃入公懼已于夜分自鴆
卒囚遂投階下死因祠公象錫厚庵有阿公祠記原詩
未記原委志之以備西曹掌故

錢楞仙司業竺嗜李義山文掇輯其佚篇二百餘首爲
樊南文補注論詩取紀文達所評蘇詩如云交柯亂葉
動無數一一皆可尋其源又云始知真放本精微不比
狂花生客慧並揭之以爲詩家標準以爲善學古人務

得其精詣所在而不徒於聲調取似也其駢文冲夷清
越藻麗自生不盡效李氏大率以指事類情經營穩練
爲主

吳清如與朱酉生沈閨生王井叔潘功甫彭詠菴章君
繡有吳中七子之目以進士官農曹入掌樞機出司文
柄有以疑義質穆相必曰問吳某丙午考試差 宣廟
諭曰吳嘉淦寫作俱佳何以不入翰林晚歲感及知遇
形諸篇詠詩出入山谷劔南文宗廬陵及震川堯峰諸
家仁和馮文介公培元其門下士也壬子以講學督學

湖北殉難

翁遂庵相國嘗語陳東塾云漢儒之學如治田得米宋
儒之學如炊米爲飯無偏重也庚寅述懷句云知過每
從臨事後多言常恐占人前

上海喬鷺洲明經爲陳雲伯詩弟子列入吳門後續七
子中嘗游關東詩如渡巨流河至老邊云扼堡分旗界
珍珍柳萬條驛長兼設卡樹倒便爲橋積勢河聲壯凝
寒雪意飄一家中外合不唱築城謠夏原云塞山明霽
色驅馬夏原徐苾麥登場早椶參結實初王曾今奉使
突欲昔藏書癯酪誰留客精藍達賴居興京城外地藏
寺云鹿苑縉流外鳩摩闢法門佛嗤留種異僧愛坐牀

尊人骨吹爲角名山借作藩羈縻神教設蒙古證靈根
噶布該和許溟生云出卡快揚鞭朝陽豔錦鞞碑荒婁
室墓草長塔兒泉楊柳嚴邊戍松花問戰船山凹見叢
菊鄉夢落吳天蓋客曹文正時扈蹕東巡作也嘗乞介
加夫人作咳南賦詩圖有咳南池館諸稿

道光戊戌夏英酋馬他倫以兵船窺虎門山陽關滋圃
軍門談笑折之詞屈而遁虎門砌造木排鐵練及增改
諸礮臺皆所部署六十生日太夫人在堂鄧嶰筠尙書
詩所謂白華自叶由庚奏絳縣剛逢署亥年也辛丑二
月督戰靖遠臺鉞交於胸以創隕於陣予世職諡忠節

先是尙書與林文忠以籌海駐虎門中秋之夕偕滋圃登沙角礮臺望月遂極山巔滋圃戰歿尙書亦戍伊犁其壬寅伊江中秋詩今年絕域看冰輪往事追思一愴神天半悲風波萬里杯中明月影三人英雄竟污游魂血枯朽空餘後死身獨念高陽舊徒侶單車正逐玉關塵時文忠亦將出關也

嘉慶三年秦小峴於孤山建蘇祠青浦陳華南爲之圖亂後重建同治丙寅落成於祠左祀白文公祠後祀秦淮海而竇東皋阮文達及小峴均附祀焉戊辰故學使吳和甫少宰卒於秦興里第杭州諸生復奉粟主附祀

先是嘗爲秦應華題蘇祠圖應華詩所謂畫圖昔是題
詩客俎豆今爲配享人也少宰有榴實山莊遺稿嘗奏
請審定文廟從祀位次續圖頒行從祀諸儒增設旣繁
于代用其書垂於國胄之義漸失疏奏各直省臣工不
得濫請

吳縣洪銘之孝廉鼎修飭內行世俗之好無所慕一意
爲詩古詩云忽忽歲云莫轉盼羣芳空初質苟未堅安
得全其終智乃禍之媒文乃害之始負才徒營營守拙
庶君子言志之作也夜云漸覺新寒入不知秋已深虛
帷怯明月靜夜感孤礎竹影破窗碎雁聲疏樹沈一鐙

搖短夢愁絕此時心讀南史云貧賤甘屈辱富貴每驕
吝鄙哉劉道人檳榔一斛進真本瓠盧得朝儀漢室隆
如何投棗栗忘却叔孫通處貴能遺權斯語苦無繼試
問歌大行何如詠喜霽不媿何平叔終慙袁愨孫黃羅
襪尙在公自負君恩誌公識琅琊意在撰碑記云何未
解脫慧業墮文字宰相三層樓先生五柳樹遐哉東陽
經不抵彭澤賦俱見才情與古冥會

雲書刺史法豐阿善射以辛卯鄉舉官中書最久出知
霑益州乙卯分校滇闈吳和甫贈以詩云麈尾清談每
夜闌元龍豪氣喜追攀官呼佛子來三異詩雜仙心識

九還紅藥香痕思畫省黃花秋訊話蒼山挽強更羨如
猿臂願學雕弓滿月彎

梅蘊生與劉楚楨論詩書云古人高製其音莊其脈隱
其味醇醇而無窮初唐諸賢如沈宋四傑體雖近律而
色澤聲響猶堅勁茂美子美出而一變鋪張揚厲發洩
無餘有功開來無德繼往韓蘇兩賢能步趨子美下此
則鄙情惡行蕪音累氣析律破法爲風雅異端滄浪言
學詩規李杜所謂挾天子以令諸侯然學李猶不若學
杜李有奇才杜有善法才不可學而能法可學而能也
今之學杜者多不讀書空撐硬句虛飾哀情則又杜之

罪人也至於取藻綴文必視所學拾唐人詩中之辭以爲詩佳者當行劣者空滑拾齊梁人詩中之辭以爲詩並得唐人詩中之意以爲詩精者入初唐劣亦不致蹈宋元惡習若採摭三代兩漢百家傳記之書以爲詩又能別之使合乎詩與不合乎詩經緯組織動與古會則顏謝不足多而李杜可易爲也陳義甚高蓋本於其師黃春谷所謂士生今日必窮乎源流正變而後詩學乃全風騷自不必論漢魏之作純乎聲情而氣骨特厚六朝以降發爲體義而文采疊興不得乎前此之聲情氣骨而但以唐爲祖本不涉乎後此之體義文采而專守

漢晉之權輿皆不能表裏胥融一光千徹云云兩君自作雖皆不逮而其說自不可廢薛介伯序嵇庵詩文集謂蘊生教人必博攷古今傳注名物訓詁審合乎貞淫邪正之旨然後可與言詩爲文亦然故所讀經注多由手錄尤肄力於春秋三傳欲撰穀梁集解正義蓋穀梁氏善於經師說最古荀書毛傳往往而合草創疏證而書未成哀辭子韻詩泛舟及包劉遂結注書約謂此又嘗謂陳氏三國史無表志鄞縣萬氏有補表而無志陽湖洪氏父子於疆域職官有補帙未及全備欲并補之亦未果善於詩而不僅以詩竟其學論本朝人詩者固

當以此爲衡而剽竊膚受之輩可以廓清掃蕩矣

從梅蘊生學詩者上元黃菊人國華江都任漢卿雲臺
田季華溥光沈羨門榮甘泉王竹溪桃儀徵黃聖臺春
熙句容陳卓人立吾鄉裕伯孚李菊秋亦先後受業蘊
生有琴銘爲伯孚題云穆穆兮愔愔忽天虛兮海深寄
遙情以孤往非所望於知音豫吾德兮清吾心生其無
事乎洞庭之野箕山之陰游學京師夢禪居士藏雷霄
琴從其孫恩抑庵假之其爲抑庵題夢禪韜光山第二
圖句云停驂且就雷琴鼓萬壑千巖瀑水流又嘗爲李
寄雲侍御題平谷山莊圖戊戌與李梅生同客山陰乞

授荆董之法蓋游藝多能如此

黃梨洲宋元學案爲全謝山校補王艘軒重加釐訂慈
水馮氏刻之版燬於西人之擾陳子相爲題壽藤圖云
學派溯宋元重訂姚江籍圖爲辛丑入都寓王文簡舊
第屬鎮海沈某作也

馮柳東官甬上校官閱十年戊戌立書藏于石經閣阮
文達爲題額庚子舟山之變四明戒嚴以閣中藏書萬
餘卷寄藏天一閣作詩三十二韻送之其秋夕園居云
驟雨高梧暑解圍清涼身世未全違綠蘋不礙魚跳葉
黑蝶晴隨蟲上衣棋罷渾忘生死局夢回已轉太平機

園官檢點秋田課尙贖紅茄一稜肥閩人姚懷祥大挑
試用知縣權定海市月城陷偕典史全福投水死初報
不實部議未議卹 特旨准給卹典柳東詩云裹屍尙
認如生面殺賊先堅必死心蹈海卽今留絕島含沙並
命有冤禽語極沈摯

海甯釋六舟學詩於蕉山借庵學畫於南屏付法師松
光尤好金石摹搨之工一時無兩阮文達嘗招至文選
樓搨彝器全形贈以詩云舊雨西湖訪秀能南屏深處
有詩鐙那知行腳天台者又號南屏金石僧入都留法
可庵竹素園搨所藏古彝器歎識瑞愍郡王見之召入

邸第賜游春澤園臨行寵之以詩譚復堂謂其搜訪古蹟輒以詩紀事爲歛程木庵剔刷竟甯雁足鐙文手拓之宵映向背宛如界畫頗自詫作剔鐙圖徵詩歌焉

桂林十子詩鈔朱伯韓龍翰臣外江任之運商麓原書濬曾躋堂克敬彭子穆昱堯皆粵西人餘則山陰楊序黼繼宗臨川李小韋宗瀛南豐趙澹仙德湘漢陽黃香圃錫祖香圃久客粵西爲人掌書記年三十餘卒江上和少竹云取醉深杯百不辭生涯輸與榜人知鱸魚切玉菘浮碧正是篷窗賭酒時春晚雜興云一別元亭再見難平生恩義重如山忍看賣宅淒涼字馬策搗扉慟

哭還

葦杭大令觀成瓜爾嘉氏有兄早卒嫂王依孺人請翁
續娶生葦杭七月而翁歿與姑撫之成立葦杭令南川
嫂已歿以子鳳瑞爲兄後所爲憶昔時樂府悱惻動人
道光庚子奉檄入黔以親老不願行有詩云怕聽募云
去逡巡不忍行兒身牛馬走母鬢雪霜盈欲泣悲無淚
呼天禱咽聲臨歧都不語惟屬報清平旋乞病歸工篆

刻書摹漢隸

魏文貞公遺笏長周尺二尺四寸有半陰面正書大唐
貞觀八年臣某執凡九字常熟翁文勤以詹事治兵揚

州巡撫安徽得於南中有長歌紀其緣起云有唐世臣
推魏氏臣徵臣暮相繼起手執摩挲餘象笏祖德留貽
照青史太原真人摺挺坐文貞秉簡侍階祀抗辭執奏
容有恪面折諧臣任詆毀十思十漸書在紙所不書者
知凡幾敷陳慷慨笏畫地主聖臣直相悅喜是惟鯁輔
非具臣封德彝輩良足恥惜哉貞觀一鑑亡嫵媚真屬
夸毗子殿前還笏老遂良當時時政可知矣百年舊物
重魚須兩朝殊遇躋鼎耳諡以甘棠比法物鐫之隸古
映鯁理要從忠孝論世澤莫侈恩榮誇貴仕偶然寶物
人吾手頑廉懦立知有以吁嗟乎皋夔之心卽龍比爲

忠爲良竟誰是君不見舉笏敗顙死卽死段家司農擊
朱泚乙丑文勤卒於花馬池軍中公子仲淵早世文孫
韜夫倩張雨生作傳笏圖袁忠節題云鄭公縱橫家亦
涉盤盂書崎嶇困委摯慷慨服鹽車低徊隱忍歷事久
不遇晚遇龍姿日表灑落開衣袂官家眞氣洞戶牖良
臣再拜陳忠諫百三十事鉤元提要書之笏善敗一一
工爬梳笏今剝泐虵蚶似手迹猶留公榻藥流傳廿有
二甲午彷彿侍宴丹霄初開成舍人常進御魏暮進笏
事通鑑繫
之文宗開成三年戊午正月 虞山撫部寶藏弄貞珉斷句後先出光
氣不得終羶淤題詩神物志呵護手澤芝樹生庭除虛

堂春陰似有雷雨作紅光紫電百蟄將潛舒出觀宜具
服再拜子諷少直遺規攄杼上銳首象忠審豐本厚下
根深鉏版頭白筆注記便仗下紫囊龔錯儲蒼皮皴駁
古松裂篆刻冲勁壇圭如大和孫追貞觀迹寶此十襲
度精廬嗚呼隋氏改玉天步徙真人御珽明堂裏啖醋
誰如羊鼻公捐金猶遜黃鶴子古來成名關遇合投水
沃石因時爾君不見中丞忠鯁無回撓急救防江副節
使將軍不喜陳湯諫持節還仗韋叡筆苦戰傷亡鼓猶
振飢軍激厲甲未弛焚旗夜照紙鳶飛碎堞朝看木驢
毀雨矢還披北海書雲積俄壓東城壘

定遠常漢東城地 請室

旋書牘背辭精醪不洗壺頭恥從容柴市詔更生銜結
玉門行萬里花馬池邊赤綠羣賀蘭山下槍幡起銜鬚
再拜戀 君恩手握笏囊耿猶視嗚呼孔道輔以笏擊
虵段太尉以笏擊泚法物旣非微流傳良有以孤臣終
邀易名典此笏屢兆門闌喜惠政猶留召埭祠前徵足
繼甘棠美兩世華光直講筵文孫今有石渠仙媿予未
得南牀侍樸直江湖茶匪堅徒逐風塵持手版幾時繕
寫述懷篇千年龜鑑猶堪續一日驪歌思黯然時光緒
壬辰方擢鄣郡監司將出都也癸卯翁文恭補錄文勤
之作仍次文勤韻題一詩其云袁公竟不媿文貞碎首

階前爭國是於庚子之事深有感焉玉海引中興書目
鄭公諫錄五卷王絺撰集諫太宗凡一百三十事文恭
在書房嘗據長沙刻本并續錄手寫進御每歲首敬書
格言以進亦金鑾故實也

改七薌摹漁洋山人小像瑞愍郡王鏞之端溪硯陰張
海門爲賦壺中天云蒼麟獨角更風姿海鶴紫芝眉宇
絕代銷魂楊柳岸唱斷朗湖秋雨南越裝輕西州錦爛
擊碎珊瑚樹長齋繡佛阿兄禪悅先語憑想古寺書攤
荒郵詩壁帽影斜如許別有範金尊賈島微妙那知天
女四綠香名十郎才調醉向旗亭賭生朝秋閨甚時重

醉芳醕蔣子延論畫絕句云周昉名因士女傳玉壺妙
筆欲爭妍江湖載酒詞人老未忘青樓聽雨年

浙江平陽南百四十里曰蒲壯其人苦草而居多以煎
鹽釣帶魚爲事遇客舟輒剽掠徐鐵孫履勘海口至蒲
門以爲此輩貴財賤命輕風濤如平地招而用之皆勇

士也作歌使里長示之云白日浪頭飛黑天梁上客

平陽

小賊船名浪頭飛竊賊口號爲黑天生理

彼獲皆不耕人失而我得爾徒乃

自苦獨漉膚革腊曝水使成沙煎黑以爲白茅炊饑婦
子海耨呼主伯釣帶犯波濤談笑滄溟窄營營錐刀微
一一血汗赤越畔豈無思王章不敢數胡爲見可欲呼

類惡作劇一朝供飲博全家陷刑辟義利爾則昧利害
爾當擇英夷茲犯順載毒求貿易據我定海城王官死
其職奪我沙角臺擄掠我舟楫彼船多珠寶花錢萬箱
積爾能挺而斃富貴在頃刻上以酬國恩下之美田宅
不見張將軍福建臺灣鎮總兵張琴珊翎氣烜赫始隸
鄉勇名遂階通侯籍高蔭逮子孫餘波潤親戚庶幾賢
椎埋作歌爾當釋其蒲壯詩云馬塞山南宿霧晴高洋
初日擁潮聲山連木堊團軍隘雲敞蒲門壯士城阨塞
有心諮戍卒官司無處覓弓兵流江兩省魚鹽地據險
須移大將營籌筆設險語重心長平陽與福建交界温

州福甯兩鎮每年會哨於鎮下關鐵孫子役兩年從戎
一集於澗東形勢紀之甚詳龔定庵所謂竝世見聞當
代故實官牘地志計簿客籍之言合而昌其詩者也

武陵胡光伯侍讀偶作一首云伏波辨篆世所怪汝南

著書意誰會熟習顏家干祿篇此外何妨等苴芥推闡

形聲溯倉頡確證古音析流派同時知者一苗興河間優貢

苗仙老病相望隔關塞文字會通大小篆豈比藝人僅

摹繪錢鄧後先宗法殊錢獻之姑用翦毫筆鄧完白石如用有穎筆江顧並

傳削劂在江艮庭聲篆尚書及釋名顧于里廣圻泉文

老筆授不得竟等仙官攬金籀張皋文惠言篆書授覓不可得何休歸

去陳東死

陳東之潮以舉人終何子貞紹基在翰林
丁憂歸湖南二家皆用有穎筆師法同源試

數篆書凡幾輩弱腕遠遜當塗令那敢抗顏希上蔡卻

從彘鼎得古致不比瞿瑛紛俗態

唐瞿令聞五
代釋夢瑛

東都奉

使篆 神璽乘暇搞豪日一再駢征未稱詠皇華持贈

可能同縞帶有時展轉託求索繭紙烏絲精畫界云云

光伯精小學著有說文繫傳校補咸豐辛亥嘗使赴

盛京恭篆 太廟玉寶也其紀行詩云二篆祖倉頡盤

蜿入符璽螭玉鏤華文百代存編紀 列聖繼景祚光

烈邁前史清文與清篆垂象中天起寶信煥絲綸篆譯

字連理 太廟尊玉寶璆冊隆 耐祀皇基肇東都廟

奠幽岐比 高宗典禮備冊寶分藏始我 皇嗣丕基

舊典虔率履 仁宗溯詒謀尊諡揚休美闕宮崇 列

后徽音齊任姒寶文今改刻畫篆先摹擬翰林與中書

載筆供任使故事加上 列聖尊號 盛京 太廟舊

藏寶例遣官磨治篆所加尊號刻入之嘉慶五年張皋

文以能篆書受廷推言於當事者宜自京師下所司等

上上玉刻成遣使奉藏其舊藏寶不得磨治當事者以

為然例格不果奏見大雲山房集皋文嘗曰少温言篆

書如鐵石陷入屋壁此最精

東之泰興人徐星伯延課其子偕沈子敦同寓星伯

京邸綠 吳山子為文淵懿深厚其篆書出於鄧石如而

蔭軒

結體能自異亦皋文之亞也後來則常熟楊詠春篆法
渾古爲時所稱

張伯高以草書得名獨郎官石柱記乃眞書王敬美謂
容字極字仿廟堂碑翁覃溪不信其說孫月峰跋弇州
所藏諸蹟而未得見此碑耆介春所得爲靈巖畢氏舊
物祁文端斷爲唐拓題云劒氣縱橫未易馴每于顛草
見精神細看運腕藏鋒意豈似濡頭爛醉人古紙餘妍
香入室靈巖秘賞靜無塵臨摹合付銀鈎筆千載猶傳
判牘新介春以任子官至戶部尙書被 宣宗優遇道
光二十五年以廣督拜協揆二十八年授文淵閣大學

士三十年降咸豐五年革八年四月英夷至天津賞侍
郎銜往定議五月以怯懦辱國賜自盡年雙峰刻陸忠
宣公集介春復重刊焉乃均不克令終亦可異也相傳
文宗嗣位嚴斥其無恥無能乃自書楹語云 先帝
隆褒有膽有識 今皇罪謫無恥無能語頗上聞致殺
其軀云

兩廣督標左營守兵張預佑高要人父廣志官把總母
梁氏側室也佑一歲而孤梁與其嫡撫之道光庚子年
十七入伍充弓箭手明年值英夷犯虎門奉調戍橫擋
礮臺臺陷被擄見夷酋屹立不跪酋欲割其髮辯叱曰

頭可割辨不可割也忱以死則曰兵固爲死來耳酋曰
不思父母乎則又曰可以對 皇上卽可以對父母不
思也酋遽起揮令去之鄧嶰筠尙書聞以白大府驗其
髮良信乃亟拔之謂足以媿厲有位爲作詩二首並書
於扇頭與之云截髮何如竟斷頭盤空硬語壓夷酋男
兒腰膂堅於鐵媿殺夸毗體慣柔熒熒孤寡影隨去
日含悽歸益悲母節寒松兒勁柏雙清好報九原知
吾鄉傅喬年先生椿官終兵部武選郎中高郵城東南
北隅地本沮洳舊名南北海子先生牧高郵日於東南
城外築隄以防瀦水植柳造橋獲成沃壤人稱傅公橋

焉前此牧馬南來城市多擾隄成馬不入城俗呼馬路
道光壬寅城南泥水中得石碣有文曰傅公隄又曰乾
隆三年三月闔屬士民公立則歷久不忘善政也橋圯
復修而楊柳未補王寬甫有詩云老樹隨樵斧今無東
郭春百年留孔道十里便行人賢宰流風在荒陂片石
淪壁窠鏽字出拭看尙如新代馬年年過誰貽市井安
功名昭利濟荒度想艱難近歲輿梁復當時寶筏看碑
陰如紀事令聞永三韓夏瘦生詩經涂荒度畝南東障
海長隄學范公出土僅留三字碣百年遺澤感秋風嘉
名利涉尙輿梁興廢城東幾夕陽萬柳搖風今盡矣更

誰補植萼甘棠

臨桂王霞軒兵備必達潁川道中云海上高蹤惟管邴
魏家台輔是荀陳語極蘊藉平生宗仰姬川讀惜抱軒
詩率書一律有云一函攜對天西月五夜如聞霜後鐘
白下文豪非並驚

袁子才

丹徒禪悅偶隨蹤

王夢樓

自謂詩

多近語亦見得失才心在建昌有循績與何蓮舫相得
蓮舫詩不持格律而兵備從容冲澹雅近中唐官渥隴
五年調任惠潮未赴卒幼霞侍御刻其遺著並附弟必
蕃桂隱詩存一卷

郭意誠與兄筠仙侍郎俱負時名厯佐張駱毛擘軍府

主文檄函牘有成勞由舉人助教游階京堂壬午卒有
雲臥山莊詩集及尺牘李文忠復其子慶藩書云尊公
以杜陵稷契之身託鄴侯神仙之迹第五之名旣齊驪
騎謝公之教復見諸郎楹書已傳世澤方遠回思往昔
同濟艱難數中興人物之宗盡平日恩知之舊更尋翰
墨大半雲霄何期衰朽之材忝廁名賢之末今者問一
流則驚其將盡望九原則悵其誰歸三年不滅之書儼
存懷袖千載斯人之歎已邈山河重觸山陽懷舊之哀
兼以子桓自念之感此則檢常侍篋中之句溟漠徒嗟
擬秣陵重禽之書音徽儻接者也有感云君子深於情

每爲情所誤情豈能誤人以不知人故賢者爲情感傾
心報知遇其次以才屈亦或以勢附才勢苟弗逮轉眼
如陌路才薄勢相臨忘情遂生妒若其才勢均旗鼓輒
分樹用情昧等差優游空大度咄嗟君子心先事初不
悟處事和爲貴然亦視所宜巍然事任屬有行係安危
古來幹濟才在斷以不疑委曲務徇人混混齋妍媸好
惡無定見賞罰或逆施謂可得人和豈意使人訾因人
成望誤轉復爲人持刀劍森環列當者尙未知徒令天
下笑事債名亦隳君子和不同諒爲志士規橈叟不以
詩名而讀書閱世浩乎有得於其心雅與東坡爲近

毘陵陸紫峰徽恩庚子舉于鄉亂後感唏時事爲樂府
數十章同郡許械比之少陵詩史徵糧吏云十萬官軍
宿江左日費千金養游惰縣官徵糧急如火里胥圖老
柳杻荷汝乏軍興罪累我圖老斂頭謝縣官鄉民忿勢
不可干有時探得赤白丸亦欲斬木兼揭竿擾之甚易
安之難往時輸糧民恐後大斗當升斛當斗虎吏下鄉
怒如吼亦或攘斂到雞狗椎嚙破瓮痛疾首出爾反爾
君知否從今飲水勿飲酒縣官無言吏吒舌飲酒猶可
莫飲血抽稅吏云徵糧不足徵關津津頭設柵按行人
爪牙之吏三兩羣什什伍伍練戩輪名詰奸宄實抽分

巧偷豪斂那敢嗔不則卽以間諜論別有禁物號煙土
掌握之物利百數十收其一猶義取以其餘贏潤官府
更有薦紳爲之主行旅孰敢攪其怒此輩得錢羨且吒
漿酒糝肉滿解舍明日官來稅間架捉船吏云官軍三
百過驛前河壩持符喚捉船大船索二千小艇五百錢
得錢卽放走無錢印封口一船載三人鞭笞惟恐後他
舟聞聲匿景逃老兵鼓怒手握刀有時強斂行客舫行
囊拋擲不敢逃汝曹性命懸我曹官軍有程日百里得
蒙放歸卽歡喜水腳領得空有名卻須酤酒謝老兵舟
子飲泣津吏賀但願官軍日日過巡城夫云衙前伐鼓

三通鳴團勇結束來巡城青帟短後得勝巾戈矛劍戟
森有聲團頭雅步如儒生一麾整隊神不驚如茶如火
旗幟明犒之以酒歡顏醒少年拳勇卽風生闐然而止
闐然爭繩以伍法勢不行方今選鍵不可得卽此虛聲
足讐賊城門兵云城門左右設欄楯弁兵守眎管鍵謹
有皤者腹夸警敏指呼市人作奸隱問之不服導使引
累及無辜眾含憤誰何之卒鑱杻緊送逆縣官立致隕
入夜統如鼓兩番東街西街閉柵欄何人挾袞私出關
守卒敢怒不敢言向來禁私不禁官從宵達旦擊寒柝
明日巡軍來大索昨夜城門失魚鑰

咸豐庚申杭城旣陷雲閣將軍瑞昌堅守駐防子城張
璧田援至城旋復陸亞章虎林復云鵠云反乎復杭城
七日復七日復猶遲不聞一路哭神勇瑞將軍頭蓬不
暇沐苦戰六晝夜矢竭芒刃禿邂逅援師集于狐同穴
戮杭湖氣少蘇上游爭逐鹿將軍老益壯指揮奠坤軸
紀其功也辛酉冬省城再陷滿營精銳已盡又困於饑
誓眾自焚無一人陷賊者事聞謚忠壯建專祠諸死事
者附祀焉

何天根河上有懷李公故中丞億云草笠蹇驢袖大椎
賊奔千里渡河追夜來十萬騎窺岸大樹森森危坐時

中丞字吉人以廉直稱道光時科場弊竇甚多甲辰任京兆尹監臨鄉試場規整肅無犯法者由江藩引疾起撫山左癸丑賊犯河北提戈營沁水中暑邪班師未幾卒向例遺摺不批公疏獨蒙 文宗硃批并命布政使崇恩恭錄焚於靈次

吳槎客謂放翁前室改適事載後村詩話齊東野語殆好事者因其詩詞而附會之野語所敘歲月先後尤多舛錯又引驛卒女詩作證會稽王伯重文瑋謂題壁詞有滿城春色宮牆柳東風惡歡情薄等句似非念故妻之語且安見爲改適耶宋人小說往往誣人闖闖可信

絕少爲作絕句云路近城南涉歷頻沈園柳老自傷神
試參小閱釵頭鳳未必靡蕪采故人其題袁簡齋紀游
詩墨蹟謂先生故不工書此卷紀游詩語多猥鄙亦小
倉本色昔范雲有言質則過儒麗則傷俗蔣過於儒袁
傷於俗自是確評

石埭沈槐卿司馬衍慶以乙未進士作令江西忼爽有
志節咸豐三年粵賊圍南昌槐卿自鄱陽率兵馳援土
兵未歷戰陳性固怯徒感槐卿忠義勉爲一擊殺數十
人七月賊乘虛襲鄱陽聲言復仇時樂平令李仁元資
齋攝縣事槐卿迂道回救與資齋共籌守備資齋助戰

先遇害槐卿力屈罵賊死資齋河南進士全家皆投井
中王伯重爲作雙忠歌當道光壬寅英人受撫之歲槐
卿上書力陳制夷之策而決和議之不可恃不十餘年
而其言皆驗任泰和多惠政戊申鄱陽水災設棚山阜
以移民居振帑下無濫無漏全活以數十萬計平時收
書最富朱評本自閔刻以下皆備所著詩文雜記嘗屬
伯重序之伯重弔槐卿詩有云篋裏丹毫皆散落刀邊
碧皿不模糊

興化劉融齋中允交河遇風作云行行已半日征旆正
飛揚岸土浮城堞河舟隱石梁草枯干塚出樹禿一村

荒旅思何由遣高歌入醉鄉萬里衝飈起征途望不分
沙封冰作磧煙市地爲雲古驛迴鵬翮寒關斷雁羣懷
人向天末書札幾時聞學宗白沙詩亦沖淡與之相近
溧陽宋雪帆司農丁未大考第四擢中允洊階卿貳總
辦京師團防章數十上官京朝垂三十年真率無緣飾
時以直言招忤不免有齟齬之者書感二絕云手織鴛
機一樣工幾年同住鳳城東祇今青鳥傳消息豔說瑤
池阿母宮自憐疏影淡於梅聊對冰姿舉玉杯寄語前
身仙骨在不須解佩託良媒蔣叔起懷宋光祿詩稱其
稜稜有風岸汪吳兩編修之亡銳爲經紀贍其遺孤他

事多類此彭子嘉詩郭令功原資李薦陸公疏竟格王
心謂滌生相國督師江表屢奏奇勛司農於數年前力
保之隨扈灤陽時奏停園亭工程論者比之宣公請罷
瓊林庫狀焉

元和張京度以學官弟子改僧服居通濟庵曰覺阿馮
林一比之著文心雕龍之慧地工書好自書所作出家
前爲通隱堂詩出家後爲梵隱堂詩曉登橫山云月落
羣山蒼煙中遠湖黑空林無人行晨光上鳥翼初陽海
上來照綠萬松色淙淙幽澗泉奔流過橋急松顛寺門
紅雲動一僧出小坐憩苔磴露氣溼衣被山下望人家

林燈耿未息歸途雜感云父母他鄉我故鄉他鄉滋味
故鄉嘗空山秋雨全家淚驛路征輪獨客腸滅竈寒依
賃春廡吟詩愁上運租航誰憐襪被西風裏消受孤篷
夜半霜題湯卿謀遺像之一云坐對青山賦女蘿草堂
岑寂類巖阿有情眷屬成仙易無賴歌辭說鬼多絕世
風姿推叔寶常年臥病學維摩荒荒齋冷風流杳滿徑
蓬蒿斷客過錢子霞得澗上草堂遺研云片石摩挲劫
火餘淚痕尙滴玉蟾蜍依稀賣卜橋亭研曾寫當年卻
聘書荒涼古澗掩柴關老衲遺民自往還料得研池新
浴罷草堂忍餓寫青山春草閒房弔金孝章云滄桑無

羔布衣身十笏閒房遠市塵夏甫閉門堅隱操泉明乞
食率天真梅花自寫遺民格芳草常留故國春多少黃
梁重入夢當年不寐復何人同時蔣霞竹朱西生皆與
交契詩境固自隔俗

蔣文恪志章爲心餘先生曾孫由給諫出爲監司擢撫
關中祀名宦王霞軒輓樸山中丞詩三峰飛雪白崔嵬
急報驚從馬上來正倚艱難舒偉略何期憔悴隕良才
崎嶇素旆嶠函險涕淚窮檐渭水哀可惜藏園文采歛
莫教名墨遂成灰

許綵章鳳絢嗜酒好爲詩月夜云月是圓時好情從別

後多自嘲六言云日臥小樓窗下偶來老圃花前自是
地偏心遠人言瀟灑殘年聞友人游華山云蓮花高足
五千丈壓住黃河勢不驕料得仙人登絕頂羣峰羅列
似來朝夷宕高簡之致時見言外族子海秋題其遺詩
云但知痛飲讀離騷散盡黃金感鬢毛今日詩人更誰
似極天姑射白雲高其村居去姑射山數十里也海秋
上元籍故晉產

宋紹興十二年同年錄自狀元王佐以下三百三十八
朱子登第名在五甲九十後人重刊其書改題曰晦翁
先生同年錄以是錄因先生存也葉潤臣詩科舉遠趙

宋抗念光堯時策名集英殿三百復有奇峩峩紫陽子
斯道振厥維其餘編簡間姓名胡纍纍榮華聿已往不
聞來者悲所以古之人植身恐及衰濶臣留心小學博
稽掌故王棗友說文繫傳校異序稱與濶臣約棗友任
文字異同棗友任典故棗友文成而濶臣之稿未聞棗
友書中往往引其說其橋西札記潘文勤刻於滂喜齋
長沙諸生閻其相石可爲周星叔甥清介絕俗詩長于
紀事卒年三十有九鄧彌之保之丁雲梧爲梓追甫詩
集二卷吾廬云吾廬自敞扉隨意坐天機山險雲封磴
樹深煙染衣虎能從客飲鶴不畏人飛采藥有時去經

年殊未歸山行云直上四五里蒼煙山曲遮稍西入平
做隱隱認人家螯葉高于屋笕泉清作茶門前多種樹
淺綠未生花吾師李篁仙先生謂其貌羸然以聳衣履
樸潔指陳時事及古今成敗得失文章人物優劣異同
使人忘疲激昂之概時露於辭色予之傾倒者非徒以
其詩而詩已卓卓可傳也

德興楊慶伯中丞重雅辛丑通籍由御史出守順慶值
歲饑開倉以振修城外石隄調成都解散安岳縣民變
頗有政聲光緒三年巡撫廣西平土盜出師援越南已
卯內召行至長沙卒沈意文輓詩云持節西行控百蠻

地分中外扼雄關偏師遠出蒼梧郡好句曾題紫柏山
數我舊游如夢裏知公生氣尙人間南荒獨立成惆悵
湘水無情去不還意文在錦城同官十稔也

漢陽胡東谷司馬兆春嘗言詩情之發也無關於理然
而根柢於是在矣詩興之寄也無藉於讀書然而蘊蓄
於是在矣遺懷云風前競秀林花發雨過相呼山鳥晴
老輩文章皆自力暮年親友最關情幾人能道腹中語
羣貴無裨身後名但得小園共棲託滄江閒臥庾蘭成
頗饒理趣非不讀書者所能

林穎叔方伯少孤承母訓署所居曰歐齋嘗直樞垣尹

京兆光緒丁丑山西旱已三年草根木皮俱盡潁叔至
報災設振關外催協餉公文來如雪片各州縣請賑請
緩征亦如之潁叔不忍其民餉不如額以此被議去官
言詩以山谷爲宗訪徐興公綠玉齋云竹已化龍悲作
兩人能幻鶴返何年釣龍臺云雙紅帆影隨鷗落萬古
潮聲到海迴西臺云死生朋友庚寅慟天水河山甲乙
存紹興奉李梅生夫子云知己稽山逢賀監高風盤谷
本家人嶧山湖云渡水殘雲黏雁影打篷飛雨併蟲聲
射烏樓云父老能談開國事登臨幾見太平時湖樓次
琴西韻云湖流一夜碧于草柳芽二月靑未花七峰別

野夜雪云望澤早知天與歲傷痍誰爲國求醫朱伯韓
歎其奇情偉抱咄咄逼人

國初平山堂久圯汪蛟門於康熙甲寅乙卯間與金眞
長太守修復洪楊之亂揚州與兵事相終始所至殘破
同治中方子箴重修平山堂落成蔣叔起紀之以詩云
喜見翬飛繞蜀岡使君今日卽歐陽果然澄曠非凡境

雍正江都志康熙四十四年
御賜棲靈寺澄曠二大字 依舊棲靈古道場雙塔刺

天森若筍萬松經雨茁如秧容齋後記知難稱敢灑塵
崖墨數行更比眞長著手難者番兵燹太凋殘行春台
又重新築平遠樓仍次第安竹院寒泉深浸月松顛飛

閣迴流丹蛟門繭竈猶存否寄語頭陀仔細看

汪蛟門比部葬

山堂

餘力經營保障湖四橋煙雨未全蕪春流漸可容

歌舫雲棧依然似畫圖壁上龍蛇追慶歷峰西簫鼓賽

司徒山童漫唱唐多令都運新詩比大蘇叔起江都人

乙巳會元也次首第一聯知明末尚不致凋殘如此而

揚州十日記之非實紀不辨自明矣倪曾沐邗溝篇紀

咸豐中亂事甚詳趙玉甫句云日臨戰地晴無色鬼戀

殘齒夜有聲張蕉雪句云白草春肥人種血青燐夜冷

鬼尋頭浩劫可想

濱州杜文端宅在太平胡同齋額曰杜陵花竹舊為韓

桂舩司寇所居道光六年屬文端文端是歲嘗畫扇贈
韓其後文端文正之喪 文宗皆於此臨奠焉王文恪
亦善繪事嘗於扇頭畫蘭贈敬文愨公瓜爾佳博川相
國嘗作山水小幀清穆簡遠不減倪文貞黃忠端雖不
以畫名而筆墨腴潤無媿當行云

周苻農閣學尊人時翥官浙江泰順視事甫六月以疾
卒閣學嚮產攜一僕匍匐千里奉以歸傅味琴贈畚周
大壽昌侍讀有云之江侍宦迹已陳可憐清白遺兒孫
逋負牒追吏何怒那識蘭臺官仍貧紀其事也乙巳館
選壬子大考擢侍講轉侍讀丙寅大考遷庶子丁丑以

閣學子告少嘗問業於徐星伯宋于廷官京師與梅伯
言友問古文義法癖嗜班書校補顏注藁凡十有七易
藏有文信國空坑敗後致人書真蹟李越縵爲題長歌
云嗚呼信國不可作文章在世猶日星此卷數行字真
氣蟠作蛟螭形空坑一敗不復振展轉江嶠驅贛汀猶
圖再引五更讖區畫兵事重丁甯國有塊肉寄海上家
已卵覆悲伶仃柳娘環娘盡嬌穉草間百死求婆娑其
餘處分若暇豫催援止亂存朝廷犯者必誅死者惜儼
然正笏持典刑未署十月八日發景炎二年歲在丁酉
幅缺蝕後完備餘力凜凜寒芒青科名如公始不媿莫

儔夢炎真鼠豕賴有公及陳參政爲宋一洗龍頭腥嗚
呼公之生也與雲降沒乘大風歸帝庭此特殘札豈留
意歷劫呵護神猶靈焚香申紙三太息想見雲車風馬
空中經

道光中龔定庵嘗謂今天下督撫需賢有兩人極可恃
可惜一聾一瞽謂仁和姚定甫黃梅帥仙舟兩中丞也
仲謙太史爲仙洲中丞孫以明經特賜舉人懷才負奇
氣馬湘帆嘗爲賦長安兩少年行其一韓叔起也丁未
館選職侍從癸丑上封事二指斥當軸鉅人持祿養交
泄沓不任事論軍事宜一兵權申國法先正失律者誅

旋請告歸會賊發其祖墓改道員從軍自效丁巳殉難
東鄉朱伯韓詩清闕圖書集上方四聲八法各專場惜
翁舊有翰林論只惜清班少諫章如仲謙者固不得謂
其不概於中庸也

固始李紅樵廉使卿穀宦蜀多惠政由瀘州擢守臨安
咸豐甲寅署湖北按察使城陷被害子謚愍肅子鶴人
方伯丁未釋褐初宰桂平擢守泗城墨經從軍有勇略
能以書生殺賊卒克武昌收廉使忠骸歸加珠爾杭阿
巴圖魯譯言忠孝男子也擢皖藩權巡撫糧盡師潰臨
難從容有詩四章授其僕藏之衣領間咸某刊之以傳

有句云九泉拜父應含笑兩代清名萬古留有蓼東詩
集并外集八卷朱伯韓子孝臣忠原一事詩才將略各
千秋之句讀鶴人詩而作也江夏程之楨詩正氣歌成
墨未乾繫鷹檻驥付摧殘雄才受制悲周處飛檄求援
阻賀蘭忍死飢軍拚苦鬪逆天悍賊識名官虜庭自效
平原節遺憾金昆一面難十載枕戈劉越石一身集謗
馬文淵酬恩壯志成孤立拜父忠魂慰九泉虎穴得尸
歸故土蛾眉拾橐出烽煙渠魁未翦長城壞可惜登壇
正少年蛾眉疑指其妹世所傳李五姐者李香雪丙辰
紀怪詩云昨逢李五姐高髻縮尺半自云產中州術得

神仙幻呵叱風雨靈鞭撻雲雷慣刀劍不能傷水火不能犯大帥檄調之欲憑定江漢我聞語未畢不覺驚拍案亦異聞也

京官改外放外吏入都用職名丹東謁客秦小峴侍郎

由溫處調杭嘉時名刺紙尾翁閣學記應作題目數行

爲丁松生所得與道光丙午順天題名錄合裝成冊以

貽秦澹如澹如賦三絕句云先公歷宦東西浙懷刺何

由日下來幸著蘇齋數行墨至今未付劫餘灰先侍郎官杭嘉

未嘗到京或者與翁閣學通問時夾入此帖以代手版文章政事吾多媿乙榜曾

何足重輕沒世料無知姓氏幾人能不負科名焚餘蠹

賸賴君收橋梓同稱恐不侔願比黃花堅晚節免教齒
冷到千秋澹如丙午京兆試副榜也

于邗山司馬卿保爲紫亭侍御孫滄來廉使子在都與
孫平叔姚伯昂蔣吟秋謝駿生帥海門葉兩軒多所倡
和薄宦大梁于役河上不廢吟詠有是吾齋集八卷抽
簪以後偶有感觸輒託于豪素其子野漁大令崇璟作
宰黔南咸豐乙卯安南匪熾竄擾普安守城力竭罵賊
捐軀婦女同日殉難長孫鍾岳赴滇乞師次孫鍾毓糾
合鄉團收復縣城並能殺賊立功得邀恩卹邗山有詩
云萬里書來不忍看舍生取義古來難誰知烽火益州

路碧血濺時土未乾黔南遠宦別庭闈一去翻成永訣
悲太岳鴻毛同是死死能報國是髻肩子女安排計早
成從容就義誓堅貞可憐血影青溪石異代同垂烈婦
名乞師一哭效包胥藹足奔馳淚眼枯念爾孤兒仇未
復大僚感動肯相扶弟兄墨經共從戎殺賊能將孝作
忠克復二城非爾力祖宗默佑得成功奏捷論功達帝
闈同懷一例沐 君恩老夫南望收殘淚不墜家聲有
二孫貴州按察使孔慶瑚檄鍾毓云爾家世篤忠貞臨
難不苟洵不媿名臣後裔 昭代完人爾兄懷伍員之
心而效包胥之哭衷甲乞師行見裹糧枕戈復仇正切

殷盼猶念爾少年孤露家難慘遭生死難知流離無定
誰料忠臣之後必可全身無如顛沛之餘已難託足不
謂瀕於九死早拚碧血沈冤曾不崇朝竟使黑山破賊
鄉團脫爾於死難助爾以同仇足徵遺愛之在人尤見
民情之可恃已未邗山卒年七十鍾岳字伯英以墨經
從軍戰功最偉貴西悍賊略盡賊深恨之以署貴西道
戰沒僅得歸元邗山殘稿付託無人適清河女修儒爲
刻續集四卷比之蔡姝之寫亡書白女之藏先集云野
漁好談詩豪於酒死事時有絕命詞四章附錄於此乾
坤一炬去飄然擺脫塵寰便是仙誓把餘魂仍作厲誅

除餘孽勝龍泉欲與明賢步後塵媿多遺憾負君親他

年附入先生祀我與秋翁二十人

明末十八先生殉難於今興義府願與安

南朱明府秋翁同步後塵

廿載夫妻苦若荼輒軻命運世間無與君

攜手泉臺去三女相隨死不孤屬兒一事惟忠厚以此

傳家可久長代我奉親卽是孝嫁姑安葬慰衷腸邗山

宜人青琳女史亦能詩白秋海棠詩四首見是吾齋初

集

道光戊申花縣相國以講學授湖北按察使 文宗踐

祚擢撫湖南庚申督師赴蜀同治三年錄湘蜀前後功

給世職李雲生駱文忠公祠詩云百二危城半劫灰公

從湘水振師來雄風一戰聲先奪零雨三年志不回絕
代偉人標史冊中興諸將畫雲臺請聽弔道昇平頌不
數甘棠處處栽一瓣心香故吏情祠堂風雨感平生十
年不改須眉色五夜如聞劔履聲北闕温波隆 帝錫
西湖秋水照神清歲時伏臘知公在跨鶴歸來認此城
祠在洗馬池爲漢趙順平侯遺蹟

漢陽袁筍咳侍郎希祖本上虞人家貧學富困記室者
十年丁未通籍王子大考擢侍講游躋卿貳性伉直以
善習負俗累庚申疏阻巡狩木蘭不得望屬車痛哭不
止士論稱之其子晉幼岐嶷德化蔡壽祺以女澤茗字

之侍郎以忠憤病不起晉自楚觸暑馳至都浹旬以毀
亡年十九澤苕哭踊斃面鬚箭入門家無五服親立族
子嘉麟爲晉後其妹澤芝嫁江夏彭祖壽之子元善舉
案甫諧崩城已慟空幃飲酖自殺以從壽祺有二女貞
烈錄李越縵爲之序侍郎詩如送王小巖之潛江云鴻
爪初經地烏衣最著名萍逢剛百里絮語每三更詩律
緣家學文章重老成瑣窗同聽雨潏水定新生又向沱
潛去驪駒動短歌雖歸如客樣欲別奈君何冷署趨庭
慣名山考業多鯁生等匏繫旅食感蹉跎未遇時作也
黃翔雲謂侍郎有內兄早歿其妻守義無依養諸家事

之甚敬每怒出穢語見之輒止非漫爲劉季緒者也
金匱侯楨志勤爲葉唐少宰桐從弟與同邑張端甫岳
駿先後從梅葛君游治古文丙午舉京兆以通說文受
知祁文端精地理纂禹貢古今注六卷詩學昌谷山谷
湖隄夜泊云璧社湖邊載酒行躍龍關外月初明夢回
燈火紅如豆錯認寒潮作雨聲

蒙古東粵觀察柏春與文魯齋爲同年由武部改官保
陽五十後漫號老鐵自謂得交梅蘊生始知詩法雜詠
古蹟云鍾山巖巢陣雲堆瓜步江聲去不同一水渾茫
劃南北六朝煙雨幾樓臺圖成割據孫權始亂後文章

庾信哀漫說新亭風景異龍岡牛首總崔嵬

建康

艤臃拒

戰水波昏第一雄關啟海門大節已傳余闕著故城誰

記呂蒙屯江迴衣帶松滋繞洲陷臺隍羅刹翻賸有皖

公嵐翠好青天隱約見眉痕

舒城

東南半壁恃巖疆北去

關津接大梁樓堞早傳金斗險江流直瀉繡溪長軍移

重鎮風雲變鶴唳空山草木荒寇至猶能馳短檝灞橋

詩思豈清狂

盧江

維揚右臂重藩屏蕭沛連圻展綠垆鳳

嶺松雲晴靄靄龍洲荻火夜冥冥一邱蓬顆開天壽十

廟英華萃地靈憶自庶頑殘燬滅百年王氣閉幽局

臨濠

北崎湖水作潮鳴捍蔽丹陽一障爭鳥道南趨西浙近

鯨波東下大江橫孤城力痛桓彝盡列岫詩傳謝眺清
鎖鑰何人綰徽歛坐看靈洗擅威名江城故壘黯斜
曠石埭金城絕楚氛萬舸靜涵秋浦月九華遙挹敬亭
雲應憐避地多遷客誰與防秋早駐軍競說桃源仙境
闕虛無聊復信傳聞池梁山一棄走輕舟持節何人鎮
上游牛渚波濤飛鷁斷蟪蛄風雨老龍愁更無鐵鎖橫
江岸卻任楊花過石頭落日慈湖訪遺蹟渡江陶侃是
英流姑熟鐵甕城低打怒潮應知嗚咽恨難消東流雪浪
朝宗近北顧雲嵐落影遙挽粟千艘溯吳越傳烽幾點
過金焦煙波淼淼愁無際誰訪中冷撥畫橈潤州螢尾流

光照玉鉤繁華莫與說揚州城當蕪後難爲賦月到明
時倍覺秋商女瓊花歌廢觀鹽官金穴委荒邱等閒喚
醒司勳夢幽咽簫聲動客愁江都牛斗分躔耀一隅如何

支郡隸洪都濤飛九派流江漢地擁孤城介楚吳烽燧

宵傳樊口遠帆檣風折石門紆荻花楓葉秋蕭瑟極目

煙塵黯五湖潯陽西陵古郡扼吳頭髮業高城俯漢流焦

土至今埋赤嶼驚濤一夕拍黃樓鼓鼙隱地鼉聲壯霜

月橫江鶴夢愁短檠狂歌久銷歇何時醜酒弔滄洲黃州

層樓四望見晴川鄂渚秋風隔暮煙雲氣重迷黃鵠影

劫灰幾換赤烏年梅花應亂江城笛木杪浮沈漢口船

回首舊游應涕淚輕塵漠漠起桑田鄂州咸豐兵事觸緒
蒼涼非尋常詠古也任邱咸舊云咸舊難爲橫槊壯避
嫌漸覺贈詩稀靜海道中云厯塊驕駟容就埒投林健
鶻不知巢嘗與承尊生結社聯吟才調可相驂斬

俞理初善言天象暨日官法以爲泰西積精然豈三代
秦漢人所豫解以某時法衡某時象是非區分則三代
秦漢人不能委其過夥程鴻詔伯敷其受業弟子也所
爲夏小正集說謂治小正者以公羊學說夏禮又古厯
大要天度四分無歲差無南極皆蓋天術經傳諸緯諸
子史記太初厯以前皆蓋天周髀是其算法渾天本非

古人所知且夏厯用顓頊法與堯厯用黃帝法不同況以渾天九執西法上注夏書不合明矣蒙言天就夏時法衡夏時象以小正說小正不執渾難蓋兼涉中西後人術工非小正意蓋本理初之說又嘗受業於黟汪南士上舍文臺作黟兩先生傳述曰俞先生高明汪先生沈潛而所學主於實事求是則一也伏讀 聖祖康熙五十五年十月諭大學士九卿等曰西洋等國千百年後中國恐受其患兩先生謂思患預防 聖人善教故於西事討論尤詳不獨治經引江戴之緒而已伯敷張石洲先生煙雨歸耕圖詩亭林到處能耕田潛邱有兒

哀遺篇我師黟縣子
俞子無買山錢作客死
力顧方閩福不如如
兩徵君惟著書書成
幸未六丁攫寫本每
許人間索親朋寥落
弟子貧校讐刊刻感
故人謂理初癸巳存
稿石洲序而刻之靈
石楊氏叢書中也南
士以甲辰冬卒伯敷
揚州聞訃詩云老輩
多衰謝先生未百年
高堂猶有母負郭本
無田孝友完身事詩
書畢世緣胡爲梁木
壞支厦失斯賢起起
鄭康成辰年噩夢驚
鄉音傳逆旅心事感
平生同學半零落遺
書誰發明一燈珍重
續江水鑒深情其記
理初教人勿有名士
氣謂人以名士自命
則無用矣南士博學
強記治經宗漢儒嘗

曰君子慎獨必驗所爲於夢蠲俗念遠佞人不作無益
事不入非禮言黜人多言兩先生不爲科舉學然汪先
生有時文話俞先生有科舉之學不壞人材論與鄭克
柔寄疇將軍詞所云八股何益六經猶在如何推倒用
意略同亦見眞讀書人絕不爲放言高論也

裕莊毅三度撫湘十年督鄂再平寇亂謳思在民黃海
華感賦句云銀槍徹隊衙城靜卻憶臨邊老大臣謂道
光庚戌莊毅剿新甯逆民李沅發事也事詳鄧湘皋金
峰嶺紀功碑其二云踞牀不語安能事牽被蒙頭可笑人
蓋指衡陽常南陔中丞中丞自爲翰林御史及監司廉

訪勤於其官以廉謹爲穆相所稱咸豐紀元自浙撫調
湖北二年粵賊自岳趨武昌圍城久徬徨行室中且起
且坐默默不一語城中捕奸細多衡州人見卽搏額長
號輒縱之去或告以是未可信曰吾鄉人也我識之不
我害十二月賊數十人上城守陴軍士皆潰自經死事
聞謚文節城中存饑銀米穀兵仗火藥皆充足盡以與
賊海華湘水詩云自古褒忠誼斯人何足論不才甘僨
事一死亦孤恩此與癸丑陸沔陽死於寇中許海秋詩
所謂勿謂帥亦死死亦何重輕勿謂官亦死死不皆分
明同一直筆馮魯川謂穆公相業自有公論惟當時黨

籍有士類而無屠沽然所薦達士類多廉謹守文之人
安足當大事哉鄭夢白爲穆相所喜粵西撫臣以食潯
梧關稅稱撫仕鄭故佞佛旣至日持齋戒殺專務姑息
論者謂洪逆之亂實基於此蓋蠢動之始一健吏足以
制之云

史道鄰幕客虞山周鶴臞霜後集四卷道鄰妾金陵李
儵空雲國變出家爲廣陵緹真道院女道士嘗爲作序
皆詠明思陵時事每首有注王伯重作令江西錄付莊
木生刻入長恩書室叢書謂先生尙有松廬集素聲集
玉沙集十一草若干卷待訪也其書霜後集後云如聽

哀殺嘯曉霜竟疑血淚漬成行
遭聞盡自宮中出直筆
無須井底藏細寫憂勤多
史闕極言蓄害信天亡
長歌不解吳詹事偏把明皇比
烈皇自注某邨在明爲少詹
兼侍讀其詩動稱天寶可謂
儼不於倫牧翁詠南都云
豈有庭花歌後閣也無杯酒
勸長星某邨則云尙言虛
內主廣欲選良家是故國舊
君之思錢過於吳也伯重
爲笠舫大令子喜藏書舊藏
宋刻浮溪集白石詞均有
祁氏澹生堂圖記與張竹泉
互鈔所未備有奴子竊張
宋刻說文繫傳潛鬻於市
伯重往告輾轉得還見伯重
明初大字本史記攜去三年
不歸且顯露欲奪之意伯

重作詩調之有爲君返魯弓顧我失趙璧之句可入藏書紀事詩

葉茗生少更家難作客瀟湘先世石林集避暑錄話皆手校刊行晚歲家滬瀆有吹網錄鷗波漁話多識吳中掌故徵文考獻足備志乘之遺其婦翁爲陳雲伯雲伯少時以試團扇詩見賞於阮文達卽以團扇贈之時號陳團扇後扇卽歸茗生夫人華姬篋中潘西圃題茗翁手簡遺跡云文史由來盛我吳誰開鐵網貯珊瑚石林自有家傳筆欲駕前賢朱與都集蓼詩成感逝波才人合付命銷磨錢唐若問陳團扇黃竹箱中淚更多其論

詩謂非但冠蓋氣金銀氣不可有卽道學氣亦不可沾
染所藏張遷碑東里潤色四字未損翁正三未之見也
潘順之前輩爲榕皋農部孫理齋探花子年甫四十卽
謝病歸築室鄧尉山中曰香雪草堂西治爲圃曰西圃
堂東小閣藏楊述禪四梅花卷曰四梅閣戴文節爲繪
山居圖四梅閣圖湖山偕隱圖各一嘗有句云老妻亦
解幽居樂催促移橈共入山謂配汪夫人也庚辛之亂
草堂及圖卷皆無恙其還山詩有天留茅屋老餘生之
句光緒紀元俞巾山爲作草堂記丁丑年七十李眉生
爲賦香雪草堂歌考楊補之墨梅四一未開一欲開一

盛開一將殘乾道元年爲范端伯畫周草窗過眼錄目
此曰四清圖卷自題柳梢青四調及柯氏次韻和作近
笄江上稱爲二絕朱正間有詩云寂寥山雨歇清晨巡
見南簷數點春相對無言肯輕笑墨夫人是息夫人一
筇尋壑又經邱已覺寒香鼻觀浮筆意更衝山意動應
消江上杜陵愁枝上圈圈晴昊光暈妝卻在盛年芳衰
翁那覓春游伴香雪中醉一場誰冢玉笛怨聲長楚
客魂銷酒思涼落紙殘花拈不起如何熬粥更燒香又
題三絕句云自題丁丑記生辰頗學君家癸巳人風子
善書君善畫騷人降世有前因倚聲幾闋柳梢青吟斷

羅浮夢不醒不是丹邱誰細數四清二絕卷餘馨不合
時宜滿肚皮孤情瘦節見梅枝流傳免落權姦手贏得
松風一卷詩補之以不直檜累徵不起黃山谷松風閣
詩卷曾藏蔡京賈似道家孫退谷深以爲憾芷間此詩
有知人論世之意非汎然題畫詩因並錄之

姚惜抱謂論衡淺處極陋深處極誕宋潛溪全是外道
李安溪雖非眞理學其言義理亦有可取惟好論文章
則甚可笑具見楊致堂所刻尺牘中於惠定宇戴東原
朱石君皆有微詞謂凌仲子文集一無足取則未爲定
論也源出望溪謂望溪不能見史記深處遠不如震川

張廉卿中書刻歸評史記謂古人之書待說而明者十
之三四因說之而益惑者蓋十五六好學深思之士顛
取古人之書反復熟讀以意逆志達於幽渺其所得蓋
有遠出尋常解說之上者自是精言濂亭於古文頗有
名謝枚如議其誥贈長山縣知縣黎君墓表多於義法
不合指摘甚當嚴六溪懷濂亭先生詩仙人玉笛誰親
聽黃鶴樓頭妙迹存待訪幽人著書處年年江水繞柴
門遺文端合醴泉留太白峰前暮草秋五嶽蒼蒼洞庭
碧一齊收納往同州濂翁墓在郿縣太白山下也

晴垣太守景星襄平邱氏善分隸以進士歸班作宰湖

外嘗於桃源新陶淵明祠咸豐間守常德粵寇陷城殉
難廷芳字爲刻其詩七言句如古樹影如人影立破車
聲學橈聲來窗內殘燈窗外雨已眠未睡乍醒時爲余
鳳笙所稱其尊人有葆光閣詩集

李蔭庭先生治寶慶尙嚴甫下車禽治猾盜數百人搗
燬盜藪百數十區開通武邵間米卡三百餘里建倉積
穀八千餘石以賽相大隊將入楚檄赴岳州承辦軍差
鄧湘皋寄二詩兼訊麗生消息云堂堂上相擁旌旄幾
隊貔貅戒驛騷扉屢咄嗟應立辨指麾談笑可忘勞人
來大漠風尤勁天入重湖氣倍豪已卜荆關衝轡過沿

湘草色映征袍來何勇決去何愆落角摧牙事未終治
亂由來用重典尙嚴原自具深衷陋邦好惡何曾定貧
國瘡痍尙待公老我州民思叔度時措病眼望王充王
麗生明經其幕客也賊攻長沙八十餘日而寶慶防堵
嚴密伏莽悉除無竊發賊下竄後復檢治橋土國王石
背洞匪所練寶勇塔忠武用以奏甯鄉湘潭之捷同治
己巳寶人臚治績請祀名宦旣奉 俞旨爲之祠而以
麗生祔祀焉

閩縣劉炯甫大令游陳左海高樹然之門曾入林文忠
幕有粵嶠從軍圖少好詩師友間佳什輒錄之及以舉

人入都謁選見聞益廣咸豐九年權莊浪茶馬廳同知
釐訂爲一集凡八十五家朱伯韓名以篤舊聞人之作
爲多如劉近宸文學紫嵐劉心香大令士棻張儻仙明
經翼張欽臣教諭肇修翁蕙卿明經時穉許秋史文學
賡皞陳心泉侍御濬皆僅見是集陳作甫謂友朋出處
聚散不常甚或溘先朝露惟單言隻辭曷所玩諷如平
生歡其用意爲不薄也作甫爲錢塘陳善扶雅從子乙
未通籍同官蘭州其從軍謠云金羊嶺頭鬼夜哭都督
新亡烏啄肉轅門吹角大點兵疾補馬鞍磨箭鏃雪漫
漫八寶山風颯颯二寺灘從官裏狐裘士卒衣裳單奚

奴厭梁肉士卒無朝餐饑寒久困交河側欲進不能歸
不得金闈少婦夢封侯那識征夫此時色微聞文吏供
軍儲連車白鏹盈長途緘滕局鏑收戎幕旗纛舒舒一
事無

陳寶珊景謨嘗官冀甯道左遷甯夏郡丞周昉叔以詩
贈別云聞說松州道秋深尙鼓擊客心將朔雁送爾固
原西榆葉關雲重桃花磧雪迷隴梅無便寄南望迴含
悽蘭雨眞孃慕黎雲短簿祠蠻箏清夜曲團扇冶春詞
倚玉王郎備量珠石尉癡勝游能幾日憔悴鬢成絲太
原三歲別薄宦竟何如俸厚全分客官閒更著書風花

晉祠晚煙樹薊門疏老我東華路勞勞感索居馬背一
尊酒屬君何限情途窮爭氣節亂劇出功名射虎邊風
暗呼鷹隴月晴毋將遷謫意寥落負平生

桂氏說文解字義證藁本臧孔繡山韓齋許印林學博
爲楊氏校刊此書其篆文則日照丁少山處士良善書

也傅楫生次韻酬處士云名山垂絕業久當古人看高

士應君傳窮涂無淚彈水雲交自澹郊島氣同寒青主

吾宗桀深勞取友端贈詩有青主
欲同看句繆篆精摹刻深心託

說文遺編披叔重奇字問揚雲早歲棄科舉斯人今不

羣抱琴樓海上寂寞賞心聞處士校有宋本說文光緒

中賞待詔

譚復堂於何心齋稱弟子爲序老學後齋自訂詞謂放翁樂府曲而至婉而深跌宕而昭彰先生因寄所託把臂遇之湖上晚歸句云拂水楊枝依稀似老子婆娑歲月謂心齋也爲題白門歸權圖云西風問渡恁老倦津梁柳枝非故詞筆依然寫愁無一語心齋爲恪慎公子京寓時喜藝菊有柴桑長小印同治丁卯出爲外吏光緒丁丑移官嶺南庚辰解組移家武林爲寓公自題菊隱吟社圖摸魚子詞又平安天涯霜信黃花依舊無恙閒庭清鎖煙霞夢秋在深深門巷誰過訪有三兩吟筇

來問柴桑長西風夜響儘落葉聲中冷香自吐寂寞一枝放者吟社往事那堪重想消寒還發高唱年來橄欖參回味贏得酒懷悲愴銀燭晃蕩一綫潮生熱淚來心上尊前供養笑老住長安紛紛棋局斂手此孤賞其供菊詩有云老夫況是宣南客花市斜街幾陳迹嘉道年間藝菊人居然尙蠟尋秋屐題供菊圖有頭銜自署柴桑長管領黃花四十年之句彭剛直議覆鄧鐵香罰捐貪吏疏以其在粵聲名與何廷謙崇禮俊啟吳寶恕翟國彥方濬師馮端本劉滄年杜鳳治林灼三諸人並論然其文采固不可沒也

雍正初寶山分嘉定而縣嘉定有錢宮詹王光祿等七
子詩選之刻其後葛其仁陳琢錢師康莊爾保黃穆之
皆有文學不必皆詩人也寶山有許海莊毛海客程茂
來金雲秋施霽雲跋文江范凌蒼蔣丹臺十家詩刻嗣
後沈夢塘孝廉取徑晚唐毛生甫騎尉宗派西江尤卓
越可傳麗農山人蔣子禮爲丹臺孫誦言經世有閉門
畫粥憂天下之句作寰鏡十六卷通古今言樂之故著
宮調譜三卷正欵凌氏燕樂考原之失姚石甫嘗語湯
貞愍曰此君經濟才奈煙霞痼癖何指所嗜者而言也
好倚聲與貞愍論詞貞愍舉董晉卿之言曰詞以無厚

入有閒子禮爭之曰詞以有厚入無閒周韜虎題其詩
集有滄海日輪光五色笑他天祿杖頭鐙之句初名爾
鏘字劒人嘗披緇繼復返初服孫伯澄贈詩有云苦吟
賈島僧還俗作達劉伶醉可埋同時如秦次游于辛伯
李王叔皆海上羈士王叔入同文館教授敘年勞由中
書至戶部郎中壬午卒年七十三

徐山人元居靈巖之麓其讀書處顏曰虹映有玉蘭一
株二百年物也 高宗四次臨幸詞臣隨扈必信宿於
此劉文清曾兩寓之手書程子四箴爲贈山人因寫虹
映山房圖合裝成卷咸豐紀元潘順之爲其後人題句

云虹橋咫尺隱君家想像靈巖駐翠華
野老尙能談往事詞臣襍被訪梅花
翰墨貽來寓典型揮毫當日發奇
馨草堂寂寞空山夜處士星明接使星
寫圖要使後人知述德休將好事嗤
二百年來喬木在春風吹到玉蘭時

一飛河帥文冲習青烏術咸豐紀元偕
甘石安農部熙欽天監挈壺正司智
博士方達江西羅上舍萬象相度
萬年吉地彭文敬贈以詩云水曹未及託
同官度地今來共據鞍卻病只求宏景術
就吟莫似孟郊寒青烏方伎山經熟白鶴
閒蹤雲路寬還欲與君西向笑飽看干

樹晚楓丹初定於望仙山之東一里後因有砂水改建
依山以避水泉卽今定陵例取穴中黃土封存候地
宮告成人石牀下穴堪輿諸人應於興工後先請獎勵
湘陰李文恭由壬辰翰林戊戌典郡漢中壬寅卽開府
全陝庚戌以江督乞養會林文忠道卒奉命督師馳赴
梧州移營武宣知賊不易了寢食失常度遂隕其身家
書有惟有屏息以待雷霆之語口占遺表有云未能辦
賊爲不忠未能盡養爲不孝或謂其才弱生死之際未
能如來歛者陸亞章感事詩陳情令伯白天回推轂旋
登上將臺聯絡東西消眈域主張剿撫絕疑猜馬賢本

正招徠策房瑄原無統馭才至竟壺頭空賫志彈章猶
荷主恩恢時粵撫爲東阿周文忠持議多異同病革指
欽差大臣關防曰送與周

澈浦嚴方伯如煜嘉慶元年以孝廉方正科通籍羅忠
節亦以咸豐元年舉是科郭樗叟簡羅山詩六十年前
樂園老奇勳表表在南山特科曠世幾豪傑吾子繼起
能追攀羅山究心濂洛之書言行無所苟咸豐四五年
間以書生提義旅及門之士共患難一死生履險蹈危
絕無顧惜陳維周嘗輓以詩云執經弟子皆驍將橫草
功名出秀才王壯武李忠武皆其門人也

錢辛楣得蜀石經左氏昭二年殘拓三十五行甚寶貴
見潛研堂金石跋尾道光中陳雪峰文學宗彝得吳門
黃氏景鈔毛詩殘本召南首章有缺文邶風獨全又從
車秋舫持謙得左氏殘字三葉與錢詹事跋尾悉合同
人助資合刊成冊此本今歸廬江劉氏咸豐戊午年京
師廠肆式古堂主人有宋拓本蜀石經殘本卷首行題
春秋經傳集解襄二第十五次行題杜氏盡十五年未
行經七千九十三字注五千二十四字葉潤臣作歌紀
之此本曾藏鄭世允家見何子貞金石跋尾後歸家幼
雲先生幼雲先生又有舊藏蜀二經一周禮卷九卷十

二穀梁傳十九行并式古堂左傳爲三經先生嘗撰蜀石經考異三卷鮑子年爲之跋今均歸廬江劉氏陳頌南所藏周禮考工及公羊桓公七年至十五年五千餘言今亦爲劉所得丁儉卿嘗於淮安書肆得北宋嘉祐汴學石經一束三千一百二十八行今歸貴池劉氏寰宇訪碑錄載陳留有周禮殘石祥符有周易尙書殘石攬古錄目同而增檀弓一石彭文勤知聖道齋讀書跋記所藏周禮十二版三百五十四行近上虞羅氏藏有周禮檀弓中庸孝經都數得四百八十餘行復得檀弓殘石初拓本百九十八行校海豐吳氏石蓮閣殘本字

殆逾倍與黃縣丁氏魏正始三字石經尙書君奭篇殘
石井印入吉石庵叢書

咸豐辛亥徐壽蘅司空蜀轡還京召接過八九刻壬子
大考遷中允視學山左諭以頃報粵寇至長沙防事如
何及城能守與否具以對其歸也復荷垂詢一切兼某
幕客優劣謹取生平志學才識操守以對他日當力擔
重寄翼國家時左文襄方客駱文忠撫幕也已未十月
文宗御清暉堂敕畫御容沈振麟恭繪甫畢天顏有
喜親書御容傳神妙手六字以賜振麟自賦紀恩一詩
附卷末壽蘅題二十四韻有云憶昔初元日欣逢出震

辰治才徵俊父隆禮浹賢親諫議昭鳴鳳旁求逮應麟
心傳商杜傅手詔答倭仁勵志忘肥瘠危明詎劫塵東
南隅瓦裂江海職珠淪戰血三千里軍儲億萬緡詔書
哀痛數廟算訓辭頻屢捷天戈振翹瞻露布申師貞王
命虎勩待閣圖麟孰剪鱷翼翻疑狹鯉馴翠華循北
狩朱輅儼南巡虞帝蒼梧野軒皇鼎水濱烏弓攀莫及
駢棘恨難伸玉殿懸遺像蒿宮泣老臣摩望飛白字涕
淚受恩身同治庚午保薦俞曲園由禮左降調補常少
光緒庚子以工尙卒于官官京朝五十年廉靖不競蓋
嘗從蕭山艮峰兩文端講學也李越縵招飲越祠嘗接

茵伏談笑軒爽自是老輩風流

道光癸未濱州相國會試第一尊人宗伯

塲

方按試吳

興書聞喜軒楊留於校士館同治辛未丹徒丁濂甫太僕在湖州試院長君立瀛成進士宗湘文和其聞喜詩韻有百年誰繼濱州盛聞喜軒中志喜詩之句太僕視學兩浙適當選拔貢士所甄錄多積學久困者孫琴西太僕謂國家百餘年來不復以制科求士惟學政之職三年一舉優貢十二年一舉拔貢其意猶近於鴻博異時學使者試拔貢喜取英俊少年能楷書八韻詩以謂他日館閣選也濂甫能留心士行不爲流俗所爲在臺

諫嘗請裁減樞務官及停止直隸米捐連出主文事而惜其積勞成疾未能就其業稱其志也

宋漫堂爲邵青門製籃輦儲汜雲詩所謂青門步微蹇竹兜未能供生平一知己千古商邱宋也陳東塾掌教菊坡多年有股疾不良於行嘗乘肩輿赴講堂由學錄銜得五品卿銜異數也其後粵人張其翮金錫齡劉昌齡褒獎爲殺矣

柏靜濤相國讀史有感云君子本無朋小人扇危辭幸災而樂禍一倡百和之一篋讒謗書四言鴟鴞詩若非王聖明其禍不可知士憎茲多口孟亦慰藉詞我生有

定命語久問辛毗作於咸豐初年竟成詩識

戊午之獄許文恪於

召對時營救不獲

陶鳧香嘗刻王子壽及崔念堂梅樹君吳更生邊袖石
孔董生詩爲六家樹君與念堂皆張船山門人樹君自
題津門詩鈔云鼠嚙蟬穿二百年搜來遺稿出塵煙題
名不比登科錄小傳如標獨行編前輩有靈來紙上舊
交無數晤燈前寒窗料理閒中業小結枌榆翰墨緣敢
云此卷少遺珠聞見非多媿小儒聊爲詩人傳梗概忍
令古本盡蕪蕪海濱耆宿傷存沒沾上風流盡有無漫
道漁洋長感舊詞壇振臂望同扶

道光乙未以前庶常散館三等者歸班銓選嘉慶己卯
強望泰趙榮俱用中書以望泰父克捷榮祖文哲均歿
於王事也赫藕香壬午庶常散館歸班選授詹事府主
簿轉祠曹升贊善本杭州駐防杭城陷時仰藥殉焉門
人盛愷亭爲輯詩稿一卷甲寅歲暮感懷云惱聽西鄰
臘鼓聲宜春帖子強書成連年烽火鄉書斷徧地瘡痍
老淚傾不信天猶留小劫那堪人再失長城

廬州江
中丞媿

余空有腰圍在自墮家風大箭橫聲情激越行楷亦極

類戴文節

雪橋詩話餘集卷第七